

TUSI AUTALAVOU - 2022

FA'ASOLOGA O MATAUPU MO ASO SA TAITASI

IANUARI

30 'Aua nei ino ino se tasi i lou Talavou
1 Timoteo 4:11-16

FEPUARI

6 Fautuaga Alofa 2 Timoteo 1:1-7
13 Manatua le atalii ta'avao Kenese 21:12-21
20 Ua tagi Iesu Luka 19:41-44
27 E pele ae le fa'apelepelea Mareko 1:1-13

MATI

6 O suiga uiga ese Fa'aaliga 4:1-11
13 O le faitoto'a o le amiotonu Salamo 1-2;19-29
20 Tauiviga mo ni so'otaga lelei
Kenese 32: 22 - 32;33:4
27 Ia manuia le afio mai i le suafa o le Alii
Luka 19:28-40

APERILA

3 Sauniga o uluai fua Levitiko 23:10-11
10 Mapu ane teisi Kenese 24:31
17 Tapa taula'i ia Iesu Eperu 12:1-4
24 Vivii i le Atua Luka 1: 30-56

ME - FONOTELE I MALUA

IUNI

5 O le malo o le Atua i le lalolagi Luka 17:20-21
12 O lou tino o le malumalu a le Atua
1 Korinito 6:19-20
19 O le ava fatafata **YOUTH ISSUE**
26 O ai Iesu ia te oe? **YOUTH ISSUE**

IULAI

3 Amiotonu 1 Peteru 3:13-17
10 O le mana o le faamagalo Mataio 18:21-22
17 O le mana o le tatalo **YOUTH ISSUE**
24 Vaaia le Atua i lana foafoaga Roma 1:19-20
31 Toilalo le leaga i le lelei Roma 12:9-21

AOKUSO

- 7 Auauna Ioane 13:12-17
14 Fa'asao le u'amea, faaleaga le fanau
DEBATE
21 O le Upu a le Atua o le pelu Mataio 10:34
28 Mataupu Silisili o le foa'i 2 Korinito 9:6-8

SETEMA

- 4 Manumalo i fa'aosoosoga Iakopo 1:12-15
11 O ai e asaina le ala i le vao lafulafuā?
Isaia 40:1-11
18 **MALOLO LE AUTALAVOU**
25 **MALOLO LE AUTALAVOU**

OKETOPA

- 2 **MALOLO LE AUTALAVOU**
9 **MALOLO LE AUTALAVOU**
16 Fa'aa'upegaina mo le fa'amoemoe Salamo 57:1-5
23 O i tatou o vala'aulia a le Atua Salamo 5:1-12
30 Fa'avae papa o le Ekalesia Mataio 16: 15-23

NOVEMA

- 6 E le ulagia le Atua Levitiko 10:1-7
13 Soifua foai mo le Atua 2 Korinito 9:1-15
20 Fa'atāua avanoa Mataio 15:21-28
27 O le vai o Laotikaia Fa'aaliga 3:14-22

TESEMA

- 4 O se lisi ese o meaalofa Efeso 4:7-13
11 Avea ma fetu ta'iala Mataio 2:1-2

Aso Sa: 31 Ianuari 2022 (Aso Sa Tupulaga)

Mataupu: ‘AUA NE’I INOINO SE TASI I LOU TALAVOU

Tusi Faitau: 1 Timoteo 4: 11 - 16

Fai mai le molimau a se tasi o Tusitala lauiloa o le lalolagi e suaia ia Charles Dickens e faasino i le olaga o le talavou faapea mai, “Was the best of times and worst of times” A tatou taumafai e faaliliu, o le taimi o le talavou o le taimi pito sili ona lelei ma le taimi pito sili ona leaga o le tagata. Aisea? Ona o taimi o le o’oo’oga o mea uma o le olaga.

O le o’oo’oga o le malosi, o le o’oo’oga o le fiafia, o le o’oo’oga o le mafaufau e fai ai mea lelei ma mea leaga. Ae o le o’oo’oga foi o faaososoga o feagai nei ma le tagata.

Ai foi o le mafuaaga lea o le tusi atu o Paulo i lona atali’i faaleagaga o Timoteo, e pei ona i ai le Tusi Faitau o le nei aso ua faamamafaina mo Tupulaga.

Fesoasoani mo le taitai

O ai Timoteo? O lo’o ta’ua i le Tusi Paia faapea o Timoteo, o se tagata mai le nuu o Lusa i Asia Itiiti (Asia Minor) o se aai o le atu Eleni. O Timoteo na fanau mai i se tinā Eperu, ia po’o se Iutaia e igoa ia Eunike (Eunice) o lona tamā o le Eleni (Greece) e le iloa le igoa. O lona uiga o Timoteo o le afa kasi, afa Eperu afa Eleni.

O le taimi o le malaga faamisionare lona 2 a le Aposetolo o Paulo, na la fetau ai ma le talavou leni o Timoteo. O i’inā na fai ai e Paulo le talavou leni e fai ma ona soātau i lana faigamalaga. E fai ma fesoasoani, ua ia fa’au’u e fai ma faifeau ma tu’u e na te vaaia le lotu i Tesalonia soso’o ma Efeso.

A o fa’auau pea le malaga faa misionare a le Aposetolo, o tu ma aga masani a tagata Iutaia, e le mafai ona tofia se tagata e fai ma faifeau, po’o le a’oa’o po’o se Rapi pe a le atoa le 40 tausaga,

peita’i na tofia e Paulo Timoteo a’o talavou. Silafia e Paulo le telē o le taleni ma le agavaa ma le tomai o lo’o ia Timoteo.

E ui lava la e le o talia lautele e tagata Iutaia, Timoteo e fai ma a’oa’o i le nu’u; peita’i mautinoa lelei e Paulo le malosi ma le punapuna o le agavaa o Timoteo i lona olaga talavou, e aogā mo le talalelei.

O le taimi la a o vaai e Timoteo le aulotu leni a Efeso, lea e i ai le Tusi leni a Timoteo pei ona fai ma faamamafa.

Fai mai upu a Paulo **f.12**, “Aua ne’i inoino se tasi i lou taule’ale’a, a ia fai oe ma fa’a a’oa’o i e ua faatuatua, i le upu, ma le amio, ma le alofa, ma le loto, ma le faatuatua, ma le amio mamā.”

Le a le uiga o ia upu, ‘aua ne’i inoino se tasi i lou taule’ale’a, ‘aua ne’i ta’uvlaea lou talavou. ‘Aua nei solomua i lou talavou ona fai ni mea e le tusa ma le finagalo o le Atua. A ia solomua ia te oe, ona fai ma faata’ita’iga lelei.

O le faamalosia a Paulo i lona atali’i faaleagaga o Timoteo, ua ia apoapoa’i atu ma ia faatumauina le loto o Timoteo. E ala i meaalofo faaleagaga, e pei ona a’oa’oina ai o ia. Ma ia manatua lelei, ‘aua ne’i fa’atalalē i le meaalofo ua tu’uina atu ia te ia, aemaise o lona valaauina ua tofia ai o ia e le Aposetolo o Paulo.

O le mataupu atoa lava mai le **f.11 – f.16**, o apoapoa’iga a le Aposetolo o Paulo mo lona atali’i faaleagaga. O le mea moni lava ia, pau lava lea o le tagata na naunau ma mana’o i ai Paulo i le taimi o lona faa falepuipuiina, ua na o Timoteo lava.

Silafia lelei e Paulo ua lava tapenaina Timoteo mo le galuega, aemaise o le feagai ai ma faafitauli. E le gata i lea, o le olaga talavou ma le punapuna a manu fau o le soifua galue o Timoteo.

A tatou faitau mae’ae’a lelei i tala o le Tusi Paia, aemaise lava i tala o le malaga a le Aposetolo o Paulo, ona o tatou iloa lea le telē o le sao o leni talavou, i le talalelei i le lalolagi. Na matuā telē le aogā o leni Talavou i le fa’asalalauina o le Talalelei i le lalolagi.

Faatinoga o le Mataupu

I le gasologa o feau o lenei tausaga, talitonu lava sa tele lava mea na faaletonu ai i tatou o le Autalavou i le faatinoina o lo tatou tiute.

Manaia ae vaevae le Autalavou i ni vaega se lua, tufa ni cardboards tofu ma le vaega.

Tusi mai i lalo ni faafitauli po’o ni faaletonu foi, na ta’uvalea ai lou tama ma le teine talavou mai le la tausaga. A mae’a ona faailoa lea i luga le ta’ita’i, manaia ae ta’itasi mai sui o le vaega e faailoa le latou faatinoga.

A mae’a ona faailoa nei faafitauli mai i vaega ta’itasi, ona saili lea po’o le a se fofō o nei faafitauli.

Aotelega a le Taitai:

O le naunautaiga lava o lenei mataupu, ina ia iloa e Tupulaga ona faataua o latou tiute. Ia manatua e le Tupulaga, ‘aua ne’i inoino se isi i lou talavou. O le taimi o le Tupulaga Talavou, o le taimi o le osoosoga o le malosi, o le taimi o le fetosoa’iina i le tele o mea faafiafia o le lalolagi. Taimi o le lelei, ma taimi o le leaga.

Ia manatua pea e i tatou o le Tupulaga Talavou, lou valaauina. Fa’aaogā tatau meaalofoa ua tu’uina mai e le Atua mo i tatou. Fai se mea e ta’uleleia ai lou aiga, ae le o le ta’uvalea. E le gata e manuia ai oe, ae manuia ai lou lumana’i faapea ma lou aiga. O la Paulo ia Timoteo “Ia oe lava ia te oe, atoa ma lau e a’oa’o atu, ia e tumau pea i ai; auā a e fai lena mea, e faaolaina ai oe e oe atoa ma e ua faalogologo ia te oe’

.....

Aso Sa: 6 Fepuari 2022

Mataupu: FAUTUAGA ALOFA

Tusi Faitau: 2 Timoteo 1:1-7

Ua tatou iai i le amataga o le tausaga, i le amatalia ai o a’oa’oga, o le a’e ai o Autalavou ma Aoga Aso Sa. O luga i Iunivesite ma Kolisi Mauualuluga. Manatu foi o se laolao lelei lea i le tau amata ai o feau o le tausaga, o se avanoa fa’a-auro fo’i e mafuta ai matua ma fanau. A o se laolao foi e ave i ai fautuaga alofa ma fautuaga lelei, auā le gasologa o a’oga o le tausaga.

Tele nisi o matua ua faatamala i lo latou tiute peita’i ‘aua ne’i mapu le upu e taulogologo atu i matua. Talitonu foi, le tele o lu’itau o le a feagai ai ma fanau, o le fesili; a o le a la se tali atu a tatou matua i le va feagai ai ma fanau?

Fesoasoani mo le taitai:

O le fa’aaauaia mai o le faitauga lava o le tusi lava lenei o Timoteo mai le la Aso Sa se’ia aulia mai foi lenei Aso Sa. Manatu lava o se ta’iala lelei foi lea mo le aga’iga o le tatou polokalame faa le Autalavou. O lenei la Aso Sa o le fa’atauina o fautuaga faa matua i fanau.

Lea ua aumai ai le tusi lenei a 2 Timoteo 1: 1 – 7 e fai ma ta’iala o se fautuaga alofa po’o pelega a matua i o latou fanau. E le toe tau fa’ailo le va nonofo ai o Paulo ma lona atalii faaleagaga o Timoteo. Ai foi o le ala lea o le naunau o le loto o le toaina o Paulo ia Tmoteo i le taimi o lona faa falepuipuiina.

O le mataupu la lenei ua fai ma faamamafa o lenei aso mo le Autalavou, o le fautuaga po’o le apoapoa’i atu a Paulo ia Timoteo. Ua manatu ai, o le a vaevaeina le mataupu lenei i ni vaega se tolu.

Vaega muamua *f. 1-2* faailoga amata (*Beginning signs*). A tatou va’ava’ai i se vaaiga e ave ai se fautuaga i se tagata (lens o f counsel), lea lava o lo’o taoto mai i le vaega o le fuaiupu 1-2. E foliga mai i le vaega o fuaiupu nei, o lea lava e mulimulita’i Paulo i le fa’ata’atiaga o tusitusiga faa Eleni. E muamua lava ona amata i upu fa’afeiloa’i po’o upu tomua, e tomua ai lana tusi.; fai mai, “Ia Timoteo lo’u atali’i pele: Ia ia te oe le alofa tunoa, ma le

alofa, ma le manuia mai le Atua le Tama, atoa ma Keriso Iesu lo tatou Ali'i". E amata lava le tusi i le faafeiloa'i soso'o ai ma lana faamalosi 'au.

Vaega lua *f. 3-5* faailoga ogatotonu (*Middle Sign*). O le vaega leni o lo'o ogatotonua ai le faitauga, o le faafetai lea a Paulo ia Timoteo i lona faatuatua. O le faatuatua faamaoni ua tumau i le Atua. A o le faamalosi 'au foi lea a Paulo ua ia faamafanafana atu ai i le loto o Timoteo. E faapena foi i le va o matua i fanau, e foliga e faapena foi lagona pe a o'o ina mafana le mafutaga. A o le fautuaga alofa, e pa'i atu ai i le loto o le fanau e faapena ona taliagofie se tu'ualalo a matua. A o le ogatotonu foi lea o le faitauga, i le manatua ai e le aposetolo o lona tina ma le tina o lona tina. O se fatu sa toto i totonu o lona aiga, lea ua tupu ma ua mafala, lea ua molimau ai foi Paulo.

Vaega tolu *f. 6-7* faailoga tapuni (*Closing signs*). I le faaiuga o le faitauga, lea ua faamanatu Paulo ia Timoteo e ala i le faamumu o meaalofoa mai le Atua. O a meaalofoa? O le faau'uina lea o Timoteo e Paulo e fai ma faifeau e faasusulu atu le malamalama o le Atua. Lea ua afio Iesu i le lagi, a o lona Agaga e faamalosi 'au ma una'ia le tagata faatuatua e tumau pea i le Atua; ma mulimuli i le faasinoga a le Agaga. O le faavae foi lea o le fautuaga alofa, o le fautuaga ua faavae i le Agaga o le Alii, ua faavae i le alofa ina ia ola ai le tagata.

Faatinoga o le Mataupu

Vaevae le Autalavou i ni vaega se lua. Pule le vaega po'o fea le mea e amata mai ai, po'o le aiga, aoga, fale faigaluega poo fea lava. Ia atagia mai ai le vaaiga lea o le fautuaga alofa.

Aotelega a le taitai

O le apoapoa'i a Paulo i lona atalii faaleagaga o Timoteo, ua faamanatu mai ai foi ia i tatou o matua lo tatou tiute tauave.

Tatou te fautua ma apoapoa'i a tatou fanau (counselling) i le taimi e tatau ma se vaipanoa lelei i le mea e ao ona fai. Ua a'oa'o mai leni tala, e le gata o le va o matua i fanau, ae mafai foi ona tupu i le va o le uso ma le uso po'o le tuafafine foi. E atagia mai ai fo'i i i le va lea faa le aiga (family bonding). O fautuaga alofa e tupu ai le fealofani ma le nofo lelei ina ia maua le filemu. A o le fautuaga alofa foi ina ia faatumauina ai le mafanafana o se mafutaga, ma le alofa e faavae ai mea uma.

.....

Aso Sa: 13 Fepuari 2022

Mataupu: MANATUA LE ATALI'I TA'AVAO

Tusi Faitau: Kenese 21: 12 - 21

O le a le uiga o le upu atalii ta'avao? I le gagana ma le lalolagi o mafauauga o tagata Samoa, o le fa'aupuga atalii'i ta'avao po'o fanau ta'avao – ua fa'asino i tagata ua ola ma nonofo i le togavao. A'o le togavao o le nofoaga e tau le maua ai ni tagata ola e i ai ni mafaufau lelei, ua na'o la'au ma manu o le vao e fai mo latou.

A o le a se vaai a le Tusi Paia, o ai lea e pei e autu i ai le atalii taavao pei ona i ai le mataupu o le Autalavou mo leni Aso Sa.

Fesoasoani mo le ta'ita'i

Le lalolagi tonu lena, lea e tau fa'amatala nei e le tusitala o le Kenese na tuli i ai Akara ma lana tama o Isamaeli e Aperamo ma Sara, le toafa ma le vao i Parana, e leai se vai, e leai foi ni mea'ai. "Ina tuli ese ia o lena fafine pologa ma lana tama".

O le tuli i le togavao, o le vavae'eseina lava lea o se tagata mai lona aiga, le nu'u ma le apitaga o tagata soifua. O le uiga o le tuli i le gagana Eperu o fa'aaogaina nei, o le alu ese po'o le tulei ese

ina ia motusia uma so'otaga ma lona aiga. O lona uiga, tulei i le vao a ua oti ai, oti ai pea ia.

A o ai lea ua tuli ese mai le aiga pei ona iai le faitauga mo lenei aso; o Akara ma lana tama o Isamaeli. Ae a mafaufau mai le amataga, i le tautua a lenei fafine Aikupito, sa faia ma le faamaoni lana tautua i totonu o le aiga o Aperamo ma Sara. Peita'i ua le lelei le loto o Sara ia Akara ona o lana tama o Isaako ma lona va ma Isamaeli. Ui lava i le sese o le auala na mafua ona maua ai Isamaeli, peita'i e le tau pulea lava e le tagata le fiangalo paia o le Atua.

O lea ua vaeluaina le alofa o Aperamo i lana fanau o Isamaeli ma Isaako o lona toto ma lona ivi. O le uso tuofe mai le a'a e tasi, e ui ina eseese eleele na toto ai ma tutupu a'e ai. Ae talofa, ua vaeluaina le alofa o Aperamo i lana fanau ona e matilatila lava le eseese o o la tina.

Lea ua tutupu fa'afitauli i le aiga o Aperamo. Ua fa'asinosinomia lana fanau moni ona ua tupu le loto mata'ua ma le lotovale o Sara; ua fa'atauemu fo'i Isamaeli ia Isaako (Kenese 21: 9). Ua leai se nofo lelei i le va o le au uso. O le mafuaaga lea o le ita o Sara ma mana'o ai e tuli ese Akara ma lana tama.

Ae a fa'apefea si tama o Isamaeli, se atali'i o ai? O le atali'i fo'i o Aperamo. E mafai ona fa'apea se manatu, ia ona pau lava o le faiga o le tala e tatau lava ona i ai se isi e autu i ai le ata. E sa'o, toe sese fo'i: ae o tua atu o lenei tala o loo taoto ai ni a'oa'oga taua ma le aoga mo i tatou i o tatou fo'i aso ma o tatou taimi.

O loo manino lava i le mataupu 16:12- o Isamaeli lava ia ma lona fa'asinomaga – “e fai o ia ma tagata e tusa ma le asini o le vao,...”; ae fai mai le Kenese 21: 21 “sa mau fo'i o ia i le vao o Parana”. O le uiga foi lena o le tatou mataupu le Autalavou, “Manatua le atali'i ta'avao”.

O ai le atalii taavao, o Isamaeli.

O se fa'aupuga e le logo lelei i le gagana Samoa ma le va nonofo ai o tagata o le atunu'u. Aua o so'o se tagata Samoa lava - e 4 lava fa'asinomaga taua mo ia – (1) o le matai ma lona aiga e ola ai, (2) o ana fanua e tua i ai, (3) o lana gagana e feso'ota'i, (4) ma lana tapuaiga e saili ai lona matupalapala i le Atua na faia o ia.

A atali'i ta'avao la le tagata, o lona uiga o se tagata ua na ona ola ua leai sona fa'asinomaga. A mulimuli la i le uiga o le tuli ese o Isamaeli mai lona aiga e pei ona fa'amatala e le tusitala. Talofa e, ua na le maua lava se mea e tasi o vaega e fa o lona fa'asinomaga.

O lona uiga ua le alofagia o ia e se tagata, Ua o'o lava i lona siosiomaga o ola ai ua le talia se mea lelei mo ia. O le mea tonu lena lea e fa'amamafa e le tatou mataupu mo le Autalavou. Manatua le atalii taavao, le tama o Isamaeli, e i ai foi lona faasinomaga na tofia ai e le Atua.

Ae ua molimau lava le Tusi Paia i le mata'utia o faiga a le Atua mo Isamaeli. Le alofa taumulimuli o le Atua mo lenei tama ta'avao. Fai mai le tusitala o Kenese, ina ua uma le meaai ma le fagu vai na tapena e Aperamo mo Isamaeli, na tali le Atua i ona tiga. Fetalai le Atua e ala i le agelu, “aua e te fefe, aua ua fa'afogaina e le Atua le leo o le tama i le mea o i ai o iasa i ai le Atua i le tama, ua tupu fo'i o ia, ua ia mau fo'i i le vao... ”. O le uiga o le igoa o Isamaeli – ‘ua fa'afogaina e le Atua lou tiga’.

Manino lelei le folasaga a le tusitala. O Isamaeli o le tama na i ai foi lona faamoemoe na tofi ai e le Atua, e pei fo'i ona ia Isaako le tama o le folafolaga.

A ia aua lava ne'i galo i ai tatou lenei mea: o Isamaeli o le tama ta'avao, a'o 'le ali'i o aiga' o le ulumatua a Aperamo. O le tama ta'avao, ae na fa'afogaina e le Atua ona tiga, ma alofa iai le Atua. O lona uiga e ui ina tuli ese e Sara mai le va'aiga fa'a le tagata, ae na ia te ia le Atua i taimi uma.

O lona uiga, o loo i ai lava Isamaeli i totonu o le alofa tunoa o le Atua ma lana fa'aolataga tu'utu'u mamao o mea e le o'o i ai le iloa o le tagata soifua. A'o le a la le uiga o lea mea mo i tatou o tagata Kerisiano i lenei taimi?

E tele manatu ma mafaufauga. E tele foi fa'aauigaga e le tagata o afioga paia a le Atua. A'o se a'oa'oga taua lava e ao ona tulimata'i pea e le tagata fa'atuatua: e alofa le Atua i tagata uma, e taua tagata uma i le Atua.

Pe se tagata e fai mai i le aiga; pe se tagata e maumau solo i le ala; pe se tama o le folafolaga; pe se tama ta'avao pe se ali'i fo'i o aiga manatua, o tagata lava na faia e le Atua – e alofa i ai le Atua. A'o le uiga foi lena o le filosofia a Samoa fai mai: 'e leai se tagata e vale'. O lona uiga, e ui ina e peiseai e fa'avasivasi se tagata i le va'ai, a'o le tagata lava e alofagia fo'i e le Atua e pei o isi tagata.

Faatinoga o le Mataupu

Manaia foi ae faatino le tala e pei ona sa taumafai e faamatalatala. Ia atagia i le faatinoga le uiga o le mataupu.

1. E faapefea ona manatua se tagata po'o se atalii taavao?
2. O a ni lagona e tutupu a'e pe a e manatua se atali'i ta'avao?

Manaia ae atagia uma mai i le faatinoga vaega e pei ona faamatala atu i le tala.

Aotelega a le taitai

O le manatua o le atali'i ta'avao, o le faailoga foi lena o le manatua o le alofa e tupu a'e i totonu o lou loto mo le isi ou uso a tagata. E i ai lava mea ua tutupu i totonu o aiga pei foi o le tala sa a'oa'oina ai le Autalavou. O le fesili mo i tatou le talavou, o le a sau tali atu i nei faafitauli? Pe e te alofa ea i le atalii taavao, po'o le tu'u pea o ia e alu seia motusia sootaga. Ae mafai ona e manatua le atalii poo le tama, poo le uso taavao, ina ua ia te oe le alofa, ina ua ia te oe le Agaga o le Ali'i e fesoasoani i lo tatou faatauva.

.....

Aso Sa: 20 Fepuari 2022

Mataupu: UA TAGI IESU

Tusi Faitau: Luka 19:41-44

O le mataupu ua faa ulutalaina mo le Autalavou i lenei aso, e faavae mai le Ioane e 11 a'o lona fuaiupu e 35, ma e manatu foi o le fuaiupu pito i la'itiiti lava lea i le Tusi Paia atoa; "Ua tagi Iesu".

A o se fuaiupu e tulimata'i i ai le vaai, pe aisea ua tagi ai le Alii Faaola. O lea lava fo'i ua atagia mai ai le itu tagata o Iesu, pe a fua i le vaaiga e faapea o Iesu o le Alo o le Atua Soifua. O le mea moni lava, afai o Iesu o le Atua, e le tatau la ona tagi.

Fesoasoani mo le taitai

I le vaaiga lava ia i le tala i le mafuaaga na mafua ai ona tagi Iesu e pei ona molimau ai Luka i le tatou Tusi Faitau mo le Autalavou..

O lagona faanoanoa o le Alii Faaola ma lona tiga ona o lona alofa aua o lona afio mai, o le avanoa lea mo tagata uma i le faaolataga. E amata mai lava i Ierusalem seia o'o atu i nuu ese. Peitai o Ierusalem, o le laumua lea o Iuta, ma o le ogatotonu lea o tapuaiga o tagata Iutaia. O tagata na mua i malae i faamanuiaga a le Atua. O lona uiga, o le nofoaga o faamanuiaga, o le laueleele, o manu ma so'o se tagata e aumau ai, o lona manuia lea.

Ai lava o le ala lea o le ootia o le loto o Iesu, auā o ia na tupu a'e i totonu o le aiga Iutaia. O mea uma foi e tatau ma le soifuaga o tagata, na faatino uma lava e le Alii Faaola.

A o le leo lilo lea e le o mate'ia e ta'ita'i o le nuu ma tagata. O Iesu, o lo latou avanoa lea i le manuia i le lagi. O le Mesia, o le tupu, ma le Faaola i le lalolagi, lea ua afio mai.

O le avanoa i le manuia e le'i teena e le tagata ao-lafoga e igoa ia Sakaio i le Luka 19:1-10. O le faata'ita'iga o le tagata sa ia

taliaina le avanoa ua maua; e talisua faatasi ai ma Iesu. O le avanoa e lei ave mamaina e Sakaio, e lei toe faatali, ae ua vave alu ifo i lalo ma talia Iesu ma le fiafia ona ua ia iloa-ina o Iesu e maua ai faamanuiaga ma le faaolataga.

O lea lava e manino mai i le saunoaga a Iesu i le fuaiupu e 41 ma le 42 faapea mai; “Ua latalata o ia, ua silafia e ia le aai, ona tagi ai lea o ia ua faapea ane, “Ana e iloa, o oe lava lenei aso, o mea e manuia ai! A o lenei ua lilo i lau vaai”

O lana fetalaiga tuusa’o mo tagata, ae le o le laueleele, aua ua filogia faatasi ma tu ma aga e lē tatau ma le finagalo o le Atua, ona o le faamalumalu ai o pulega sauā a Roma.

O lona uiga, o le avanoa mo tagata ina ia salamo ai ma iloa ai lo latou faatauvaa, ae ua leai, ua latou manatu mo so latou lelei ae galo ai, o Iesu, e le o se tupu faale-lalolagi, a o le tupu i le lagi ma le lalolagi.

E pei le avanoa e le’i lagonaina e le tagata sa tu’uina iai le mina e tasi, e tusa ma le faataoto a Iesu i le fuaiupu e 11-27. O le mina sa avatu ma le faamoemoe o le matai, e toe fo’i mai, ua iai se faasiliga faapei o isi auauna. Ae ua nofo ma teu i le solosolo, ma ua lē mauaina ai fa’amanuiaga sa maua e isi auauna, o le faailoga mautinoa o le avanoa ua maumau

O le ala lea ua silafia ai e Iesu, o le aai sa fai ma faamanuiaga i tagata; o le a fai ma nofoaga mataga e le fia aumau ai se tasi, auā o lea ua ia valoia lona faatafunaina, ma lona olopalaina e nuu tuaoi, ma e ita mai ia te i latou.

E taua lava le faitau i le mataupu atoa o lo’o i luga atu o le tala faamamafaina mo le tatou Autalavou; e manino atili ai le vaega ua faitauina a iloa ai le mafuaaga o le tagi o le Alii Faaola.

A o le taumafai mai lava lea o Luka e tau faa-ata-ata mai le Iesu o loo momoli mai i lana tusi, o le faaola na tuuina mai e le Atua, ina ia faaolaina ai tagata uma.

Na afio mai Iesu na te aumaia le avanoa ina ia salamo, ma faaolaina ai tagata Iutaia, ae peitai, ua latou le mafai lava ona iloaina le asiga mai le Atua e ala ia Iesu Keriso.

O manuia, sa lilo i le vaai a tagata Iutaia ma le au-faresaio. Ona ua latou lē talia ma ua te’ena le manuia ua sau ma Iesu Keriso. A

o le manuia fo’i, ua leva ona iai ma latou, ae ona o le latou agasala ma le tete’e, ua mafua ai ona lilo i le latou va’ai lea manuia.

Faatinoga o le mataupu

1. Aisea ua tagi ai Iesu?
2. O ai le Iesu e pei ona faamatalaina e Luka i lana Tusi Faitau?
3. I le vaaiga lava ia faa le tagata, o a faa lagona masani e mafua ai ona tagi le tagata?

Faamatala le uiga o le fuaiupu e 42 e tusa o le tagi o le Alii Faaola “Ana e iloa, o oe lava i lenei aso, o mea e manuia ai! A o lenei ua lilo i lau vaai.

Aotelega a le taitai

O le tagi o Iesu, o le faailoga lena o lona alofa i le tulaga pagatia o le a o’o i ai Ierusalem pe a o’o ina mavae atu o ia. Manino lava i le faamatalaga a Luka pei ona iai le tatou faitauga, “Latou te olopalaina foi oe, atoa ma lau fanau i totonu ia te oe”. O le faailoga lena o le a o’o i le lalolagi ma Iuta uma i lalo o le pule malosi a le malo o Roma. E le pepelo saunoaga a Iesu, o i e iloa ai le moni ma le faamaoni o ana upu. O le ala foi lea o lo’o naunau mai ai Iesu, oi talofa ia Ierusalem. Talofa ia Iutaia uma ua le iloa e oe ona po ua asia mai ai oe. Lea ua afio mai le Atua e ala ia Iesu, e asiasi mai i ona tagata, ae ua le iloa o ia. Tatou le Autalavou, e taua avanoa tatou te mafuta ai ma fe faasoa’i i Afioaga Paia a le Atua. O avanoa tatou te tumau ai i le faatuatua ma talia Iesu i o tatou olaga, ne’i meane ua asia i tatou e le Atua. E lelei le asiasi mai o le Atua i lou fale, a o lo’o e ola tapena ma e sauniuni i so’o se taimi.

.....

Aso Sa: 27 Fepuari 2022

Mataupu: E PELE AE LE FA'APELEPELEA

Tusi Faitau: Mareko 1:1-13

Masani i tatou i tua i o tatou aiga i mea faapenei, e ui na pele i tatou i le va ma matua, peita'i e iai lava le taimi e sasa ai. Manatu foi o le uiga lea o le faamamafa mo i tatou le Atua, "E pele ae le faapelepelea"

O le alofa faapelepele lea e fai mai nisi o le fai tamavale, ma o le alofa lea faaletagata. Ae ole alofa faa-le Atua i lona Atalii o Iesu, e pei ona atagia mai i le tusi o Mareko, o lo'o atagia mai ai le uiga lea o le Atua i lona atalii o Iesu, e pele ae le faapelepelea.

Fesoasoani mo le taitai:

O le papatisoga, o se tasi lea o sakarameta taua i le tatou talitonuga faa le EFKS e lua ai sakaraemeta tetele. Ua tatou molimauina uma foi le sauniga ole sakarameta ole Papatisoga, pe a oo ile Aso faapitoa mo le fanau. O se sauniga na tatou ta'utino uma ai lava, mo le ofoina atu o fanau papatisoina, ia fa'aogaina o latou olaga mo le Atua ma lona finagalo.

E faapea foi la le agaga o lo'o aumai ai e Mareko le papatisoga o Iesu Keriso, i le amataga lava o lana tusi. Ole papatisoga o Iesu, o se faailoga maumaututū lea, ole ofoina mai e le Atua o lona lava atalii pele e toatasi, ina ia faia lona finagalo i le lalolagi. O le faatinoga moni lea ole pele, ae lē faapelepelea.

E pei ona taua ile fuaiupu e 11, "Ua o'o mai le siufofoga mai le lagi ua faapea mai, "O lo'u atalii pele oe, ou te fiafia ia te oe." E le gata la i le faaaliga manino mai ai mo i tatou, o Iesu Keriso lava o le Alo pele e toatasi o le Atua, lea na valoia e le perofeta o Isaia, e pei ona taua i ile fuaiupu e 2, ae o lo'o auamaia ai foi ii le ata manino o le mamalu silisili ese o le Atua, ae peitai ua ia tuua lava lona mamalu ae ua ia afio mai, e ala i lona atalii pele e toatasi, ina ia mau faatasi ma le lalolagi.

E soso'o lava la le papatisoga o Iesu, ma le avea o Ia e le Agaga i le vao e pei ona taua ile fuaiupu e 13. O i o lo'o i ai manu feai, ma na fa'aosoosoina ai o Ia e le tiapolo. O lo'o atagia i i le lē faigofie ole galuega na ofoina mai ai Iesu e lona Tama. O se fa'aailoga o lo'o atagia manino mai ai foi le alofa lea faa- le Atua, e pele ae lē faapelepelea. O lona uiga e o'o lava fo'i i le Atua, e iai lava le ituaiga lagona lava lea, e ui na pele ae le faapelepeleina.

Fa'atinoga o le mataupu:

1. O le a se leaga o le faapelepeleina o tatou fanau?
2. O a foi ni itu lelei e tatau foi ona talia le faapelepeleina o fanau?

Aotelega a le taitai

Tatou le Autalavou, tatou le lagonaina le taua o lou valaauina o oe le tama ma le teine talavou mo Keriso. Silasila foi i le galuega Faaola a Iesu Keriso, e le o se galuega sa faapelepelea e le Atua lona Atalii. Fai mai le molimau a Mareko i le amataga o lana tusitusiga, na ona uma lava ona papatiso o Iesu soso'o loa ma le aveina o Ia i le vao e le Agaga.

O le fesili, o fea se mea fai mai o le atalii pele a'o lea ua toe ave i le vao i le po e fagafulu ua faaosoosoina e le tiapolo? O le uiga foi lea o le tatou mataupu, e pele ae le faapelepelea. Ua uma ona mamauina i le faatufugaga faa le Atua, ua lava tapena, ua maea lona papatisoina, ua ia te Ia le Agaga o le Atua e tete'e atu ai i faaosoosoga.

E faapena foi i tatou le Autalavou, totonu o tatou aiga i le va ma matua, e pele i tatou ae le faapelepelea. E iai taimi o le lelei, ma taimi o le leaga. A ia manatua pea e i tatou le alofa Silisili o le Atua, ua Ia tuua ai lona mamalu ae afio mai e ala ia Iesu Keriso, ina ia militino ma mafuta faatasi ma le tagata agasala.

.....

Aso Sa: 6 Mati 2022

Mataupu: O SUIGA UIGA ESE

Tusi Faitau: Fa'aaliga 4: 1-11

Ua tatou i ai i le suiga ua i ai le gasologa o mea o le lalolagi. A vaavaai i nei suiga ua matua'i maofa ai lava le loto. Suiga uiga ese, i le mau fa'ama'i eseese ua lofia ai le lalolagi, ma ua aafia ai le soifua maloloina o tagata. O nei suiga e mafai ona faapea o suiga le lelei poo suiga leaga.

O suiga ua tutupu ai le matata'u i o tatou tagata, aemaise le ta'aviliga ua iai nei le soifuaga, ona tupu a'e lea o le fesili, o ai na afua ai nei suiga? O a ea uiga o nei mau fa'ama'i ma nei mea ua tutupu i lo tatou ola? Ae se'i o tatou asia le tatou Tusi Faitau po'o a ni suiga uiga ese o lo'o aumai ai ma taumafai e feso'ota'i mai mo i tatou le Autalavou; a o se feau faaleagaga mo le soifua ma le ola.

Fesoasoani mo le taitai:

O le tusi lenei o Faaaliga, o le tasi lea o tusi o le Tusi Paia e matua faigata ona manino ma malamalama i ai le tagata faitau pe afai e le saili ma suesue lelei i ai. Aua foi, e le gata ina fa'aaogaina e le tusitala meaola ma manu, ae faapea foi ona ia fa'aaogaina fuainumera ma lanu eseese e faamatalaina ai faaaliga o loo ia vaaia ao faaunuu ai i le motu o Patamo. O le gagana foi o loo faaaogaina, o se gagana faalilolilo e le malamalama iai le toatele, sei vagana lava Kerisiano o le uluai senituri o e o loo soifua ma ola i totonu o le aasa ma le vevela o sauaga i ia ona po.

Peitai, ua avefa le faigata o le gagana o loo faaaogaina e le tusitala o Faaaliga ma ala ua soona faauiga seseina ai e le toatele o tagata faailoga ma faailoilo o loo taua i totonu o le tusi lenei.

E iai le talitonuga faapea, o le tusi lenei o Faaaliga, o se tusi o faamasinoga ma faasalaga, *woes and punishment of those who have recanted their faith, and blessings to those who have*

persevered in the face of persecutions. O le faamasinoga ma le faasalaga mo e le talitonu, ae o faamanuiaga ma le faaolaina mo e o loo faamaoni pea i le Atua e ui ina puapuagatia.

E afua lea talitonuga, aua foi, i le amataga lava o le tusi lenei, o loo faamatalaina ai e Ioane le faaaliga i le agelu ma tusi e fitu o loo auina atu i ekalesia e fitu i totonu o Asia. Le ekalesia i Efeso, le ekalesia i Semurana, Perekamo, Tuatira, Sarataisa, Filatelefaia, faapea ma Laotikaia. Ao ia tusi, o loo faailoa atu ai le faamasinoga ma le faasalaga a le Atua, i e le faamaoni, ma le manuia atali mo e faatuatua, talitonu faamaoni ia te ia.

Peitai, ina ua oo mai i le mataupu e fa ma le mataupu e lima o le tusi o Faaaliga, o i lea e foliga mai ua sui faafuasei ai le lagona ma le manatu o le toeaina, Ua sui foi ma le gagana o loo momoli atu ai le feau i le au uso kerisiano. Ua le o le gagana o le faamasinoga ma le faasala, ua le faamafanafana foi faalototele, ae o le leo ma le gagana o le iloaina e le tagata o le faatauvaa pe a faafesagai ma le silisili ese ma le paia o le Atua.

Fai mai le molimau a le tusi o Fa'aaliga Sa fa'ateia foi le Aposetolo o Ioane i le Ofoofogia o le Atua ina ua va'ai tino i le suiga uiga ese o le Silisili Ese o le Atua. Le suiga o lana va'ai mai i mea o le lalolagi aga'i i le mamalu ma le matagofie o le lagi o afio ai le Atua o 'Au.

“Ua mavae atu ia mea, ona ou iloa atu lea, faauta, o le faitotoa ua avanoa i le lagi, o le uluai leo foi na ou faalogo ai e pei o le pu ona tautala mai ia te au, ua faapea mai, ‘Ina sau ia i luga nei, ou te fa'aali atu ia te oe mea e tusa ona tutupu amulī’.

O a mea ua mavae atu? Ua mavae atu le va'aiga lea na iloa ai e Ioane (i le mataupu muamua) - le Tasi e pei o le Atali'i o le tagata i totonu o tu'ugalamepa e fitu po'o Ekalesia e fitu.

Na suia mai i lena; i le va'aia e Ioane o le Atua Silisili Ese o afio i lona Nofoali'i Mamalu i le Lagi. Ua se'e mai le va'aiga a Ioane mai le lalolagi aga'i i le lagi. Le mamalu lena lea e tau fa'amatala nei e Ioane fai mai e uma upu o le gagana, e le mafai ona fa'amatala le uiga ese o mea fou ia ma suiga uiga ese na va'aaia e Ioane.

Fai mai Ioane: o le o alalata'i i le Nofoali'i e felanulanua'i ma fe'ilafi aua ua fa'aofuina i ma'a taua aupito sili ona matagofie o le 'iasepi' (jasper), ma le 'salikea' (carnelian-ruby) e mumu lona foliga. E le gata i lena a ua siomia le Nofoali'i e le nuanua e pei se samaraki (emeralds) lona lanu meamata. O mea ia e fou i le va'ai a Ioane.

O le maa iasepi ma le maa salikea, tasi ia o maa taua taugata o loo iai i le lalolagi. O le maa iasepi, e le tasi sona lanu ae felanulanuai, ae matele lava i le lanumeamata feilafi, ao le maa samaraki e mumu totototo e pei o le toto o le tagata lona lanu. Ao le nuanua ua outou silafia ma ua tatou iloa lona matagofie pe a oo ina vaaia i aso faatimutimu. Se'i faauta la i i suiga uiga ese na molimauina e le apsoetolo.

Ua le gata i le matagofie o le va'aiga na iloa e Ioane, ae sili atu foi lona mata'utia o mea na fa'alogo i ai o ia i lea lava taimi. Fai mai e le mapu i le ao ma le po ona alalaga o meaola e fa (e pei se Leona, se povi ta'anoa, pei se tagata, pei se aeto) i le vi'iga o le Atua, "E Paia, e paia, e paia le Ali'i le Atua e ona le malosi uma lava, o le na soifua, o loo soifua foi, o le a afio mai...

Ae a vivi'i la meaola nei e fa ma fa'ane'ene'eina le o afio i le nofoali'i, ae fa'apau'u fao toeaia e 24 i luma o le nofoali'i. E mata'utia. Ua siliga i le tupu o Roma ona ifo i ai tagata uma, a'o lea ua to'ele fusisaito a toeaia o le nu'u ma mea uma i le Mamalu o le Atua.

O le upu moni o se va'aiga mata'utia lea i le mafaufau o Ioane. Ua leva foi ona ola i le lalolagi, e le'i va'ai pe fa'alogo muamua i se mea ua fa'apea. A'o suiga matautia ia ma suiga uiga esea ia na molimauina e Ioane, sa ia tauivi pea e tau saili lona uiga mo ia. Ua sui mai i mea masani o le olaga i le lalolagi aga'i i mea mata'utia ina ua pupula ona mata i le Silisili ese o le Atua ma lona mamalu i le lagi.

O le tau i lea o le tagata ua tumau i le faatuatua i le Atua. e faapupula e le Atua i lona mamalu ma lona matagofie. O le uiga lea o le taumafai mai o le aposetolo. Ina ia ola ma le ma'atua e le tagata fa'atuatua, e mavae atu mea o le lalolagi lenei – ona

va'ai lea ma fa'alogo i le Silisili ese o le Atua i ona lava taimi ma lona mamalu silisili ese.

E suia mai le va'aiga masani o le ola puapuagatia, le ola pologa, le ola to'ilalo fa'ale-lalolagi - i le matagofie o le lagi o afio ai le Atua o 'Au, o Le pule aoao i mea uma i luga ma lalo nei.

Faatinoga o le mataupu:

1. O a ni suiga uiga ese na molimauina e le aposetolo o Ioane i le tusi o Faaaliga?
2. O ai na tusia le tusi o Fa'aaliga?
3. Na faapefea ona iloa e le Aposetolo le faaaliga e pei ona faitauina?
4. E mafai faapefea ona tutupu suiga uiga ese i o tatou taimi ma lenei seneturi?

Aotelega a le taitai

I totonu o lo tatou ola fememea'i ma le le mautonu ona o tofotofoga e o'o mai - tatou te molimauina ai le Silisili ese o le Atua - ina ua fa'aalia e lona mana suiga uiga ese i o tatou olaga; suiga i le gasologa o le lalolagi ma ona taimi; suiga fo'i o le natura o mea agai i le fa'afanua fou o le malo o le Atua e fa'avavau.

A o'o la ina gaoioi le Agaga o le Atua e fesui'ai mea; ma fa'ataoto mea uma i o latou taotoga o finagalo ai – ona tu'u fesilisili lea o le tagata - o fea o i ai a'u ii i le vaimea lea? O lea la'u mea lea e fai iinei. O lea le finagalo o le Atua mo a'u? Atonu fo'i o lagona ia o le Aposetolo o Ioane na o'o ifo i taimi o lona fa'aunu'ua i le motu o Patamo.

Ma ia tatou manatua, e faia lava e le Atua suiga uiga ese i o tatou olaga; pe a tumau lo tatou ola faatuatua.

.....

Aso Sa: 13 Mati 2022

Mataupu: O LE FAITOTO'A O LE AMIOTONU

Tusi Faitau: Salamo 118: 1-2 / 19-29

O le faitoto'a o le amiotonu, ua faatusaina i le faitoto'a o le ola po'o le faitoto'a ua na o le tagata faatuatua e mafai ona sao atu ai. O le fesili mo i tatou le Autalavou, ae faapefea la le tagata e le faatuatua, e mafai ea ona sao atu i totonu o lena faitoto'a? Tatou le Autalavou mo Keriso, o le a lau na o faatino i lenei vaiata. Po'o le faitoto'a o le amiotonu po'o le faitoto'a o le agasala, o lo'o mafuli i ai le toatele o i tatou.

Fesoasoani mo le taitai:

O le Tusi o Salamo e mau eseese lava le au atamamai na o latou su'esu'eina le Tusi. O se tasi o molimau, o lo'o ia vaevaeina le Salamo i vaega tetele e 4.

O le Salamo e 118, e i lalo o le vaega muamua o Salamo o Vi'iga o le Atua (Praises of God).

Salamo o Viiga e tolu vaega o lo'o vaevaeina ai

1. Pese ma viiviiga (Hymns or descriptive praises)
2. Vi'ivi'iga ta'i to'atasi (Individual songs of thanksgiving)
3. Vi'ivi'iga aoao tetele (National songs of thanksgiving)

f. 1-2: O le amataga lea o le ola vivii o le tagata Isaraelu. O le pese lea a le tagata Isaraelu, e na te viia ai le agalelei o le Atua,. E tomua lava i le viiga, e ao ona viia le Atua, e ao ona faafetaia o Ia aua e faavavau lava lona alofa.

f. 19-20: A o'o ina o malaga tagata Eperu i Ierusalem a i le malumalu mo le faamanatuina o le Paseka, o le latou pese e pepese fetalua i ai mai le ositaulaga i totonu o le malumalu.

O le to mai ia, o le faitoto'a po'o le tatalaina o le faitoto'a o le pese lea a le tagata agasala ma le tagata amioletonu e fia ulu i totonu o lea faitoto'a.

E foliga mai i le ata o lo'o aumai i le tala, o lea e tapuni le faitoto'a, o lea e fia ulu atu i totonu le tagata.

A o le tali fuaitau a le ositaulaga, o le faitoto'a, o le faitoto'a o le Alii e na o ē ua amiotonu e mafai ona ulufale atu i ai.

Faitoto'a o le amiotonu, o le faitoto'a mo le tagata faatuatua e ulufale ai i totonu. O le sootaga lena o le tagata ma le Atua.

O le ata o le faitoto'a o le faailoga lea o le ola. O le ata vaaia foi lea o le ala fou ua tatalaina mo le tagata agasala. Manatua le taimi o le Esoto, i le faitoto'a lea na valiina i le toto o le tama'i mamoe, o le faitoto'a o le faailoga lena o le faaolataga mo Isaraelu.

O le faitoto'a la pei ona faamamafaina mo i tatou le Autalavou i lenei aso, o lona uiga o le ola fou mo le tagata Isaraelu. O le faitoto'a o le amiotonu ua tatalaina, o le faaolataga mo tagata uma.

f. 21-25: O le agaga o le tagata Isaraelu a o'o ina to lauapi, i taimi o le latou malaga i Ierusalem, e ave o latou fale ie (tent).

Auā foi, e na o sina taimi pu'upu'u lava e faaoga ai. E tau saili solo ni mea e faaoga e fausia ai o latou fale.

Peitai o le faaogaina o le maa tulimanu po'o le ma'a fa'avae pei ona i ai le faitauga o le tala. O ma'a na sa faaoga e tagata Isaraelu e taotao ai o latou fale ie.

O se fiafiaga foi mo nisi tagata Isaraelu pe a o latou mauaina lea ma'a, ona avea lea ma maa tulimanu aupitoaluga.

O le aso lenei na faia e le Alii tatou te olioli ma fiafia ai, o le aso e manatua ai le alofatunoa o le Atua ia Isaraelu i le taimi o le Esoto

Ia e faaola mai "O lo'o faaliliuina mai le gagana Eperu o le Hosanna (Save us now). O le ata vaaia o le valoaga i le Mesia, e faaola ia i latou

f. 26-29: O le talitonuga o le au Isaraelu, e i ai le taimi e o’o mai ai se isi malosi e sili atu, e faaolaina i latou.

A o le uiga tonu lava lea ma le aano moni o le Salamo, “O le faaola mai ia i matou”

Le ala lea o lo latou pepese i le malumalu, ma avatu ai le taulaga i luma o le Atua. O le alaga a le tagata fia ola, o le alaga a le tagata ua fia maua le faaolataga.

Faatinoga o le mataupu: (Bible Study)

1. Vaevae le autalavou I vaega se 4.
2. Ia tofu uma vaega ma o latou fuaiupu o le a latou galulue ai.
3. **Group 1 – Fuaiupu 1-2**
4. **Group 2 – Fuaiupu 19-20**
5. **Group 3 – Fuaiupu 21-25**
6. **Group 4 – Fuaiupu 26-29**
7. Ia faamatala mai le uiga o latou fuaiupu ua filifilia, e faatatau i le mataupu o lenei aso.

Aotelega mo le Taitai:

O le faitotoa o le amiotonu, o le mea moni lava ia, o lea e tausinio le au faatuatua e fia ulufale i lenei faitotoa. A o le mea ua mautinoa, ua maua lo tatou avanoa i lenei faitoto’a. Pe afai ua tatou salamo ma fulitua mai le leaga.

I le Tusi o Salamo, o le faitoto’a o le amiotonu o le faitoto’a lenei o le faaolataga mo tagata Isaraelu. O le faitotoa na faasaoina mai ai i latou mai le ola pologa, peitai o le afio mai o Iesu ma lana malaga atu i Ierusalem, ua faamautuina ai le faitoto’a o le amiotonu ua tatalaina mo i tatou uma.

Le tupulagae e, teine ma tama e eseese auala a le fili e taumafai e faaleagaina ai oe. Ae a tumau lou faatuatua i le Atua, ona mautinoa a lea o lou avanoa i le faitotoa o le amiotonu.

Fetalai Iesu, “O a’u nei le Ala ma le Upu Moni ma le Ola, e le mafai lava ona sao atu se tasi i le Tama, pe a le ui mai ia te au”

.....

Aso Sa: 20 Mati 2022

Mataupu: TAUIVIGA MO NI SO’OTAGA LELEI

Tusi Faitau: Kenese 32: 22-32/33:4

Ua tele lu’itau ma tauiviga o feagai nei ma le soifua tautua o i tatou le autalavou. O tauiviga mo le ola lelei ma le manuia; ae i ai foi ma le isi ituaiga tauiviga e ese lava le mea o lo’o aga’i i ai. Peitai o le faamamafa o lenei aso mo le mataupu mo le autalavou, lea o le a tatou su’esu’e poo a sootaga lelei e pei ona taua i le mataupu. O a foi ni tauiviga o lo’o momoli mai ai.

Fesoasoani mo le taitai

E le o se mea faigofie i a Iakopo lona alu ane e faafetaia’i lona uso masaga ulumatua o Esau. Aua foi e le o lelei le la sootaga. E le o lelei lo la va faa-le-uso. O loo matua va lava le fogavaa i lo la fesootaiga faa tino, toto ma aano. O se sootaga ua loa ona motusia, ua asoa foi e lei toe vaai le tasi i foliga o le isi.

A o le fesili, poo ai na faapogai ai? o le tali o Iakopo lava. Le tagata fai togafiti poto, taufaase’e ma lelei i ala pupuu. Lea lava na ia maua ai le tofi o le ulumatua i le meaai e tasi.

Aemaise o lona fao limapoto foi o faamanuiaga mai ia Isaako lo la tama. Ona fofou lea o Esau e fasioti ia te ia. Ma o le mafuaaga lea na faasola ai e lona tina alofa faapito o Repeka i Patanarama e nofo ai i lona tuagane o Lapana.

Fai mai le tala o iina na ola ai Iakopo, ua ia fai ava ai i afafine e toalua o Lapana o Lea ma Rasela. Ua ia maua faamanuiaga e tele, ao lea na fetalai manino le Atua; Ia toe foi i lona nuu. Peitai, o le a lava le tele o faamanuiaga ua ia maua, e iai lava le mea o loo

atu ai le loto o Iakopo. O loo iai lava si lave lea o loo faa fatuulu i lona manatu; o Esau.

O le amataga o le mataupu e 32 o loo faamatalaina ai le auina atu e Iakopo o ana auauna e ta'u atu ia Esau le mea o loo nofo ai. Aemaise o manuia ua ia maua e ala i le tele o ana lafu manu, o povi o asini o mamoe o ana auauna tane ma fafine.

A o le a le mafuaaga, ina ia ta'u atu ai ia Esau o loo tumau pea lo laua sootaga faa-le-uso moni. Ma ia tumau pea i laua i le alofa faa toto ivi ma aano.

Paga lea, e foi mai ana auauna na o ma le feau ia Esau o lea ua o mai ma ona tagata e 400. Ua tupu ae le fefe o Iakopo, ua ia aioi i le Atua mo se lavea'i.

A vaai foi i faiga a le tagata atamai e fai togafiti, e faamoemoe i ana upu suamalie malu. Fai le faatonuga i ana auauna a feiloai ma Esau, pe a fesili mai poo ai e ona ia manu. Ona fai lea iai o meaalofa mai lau auauna o Iakopo lou alii Esau.

E le gata, o lea na ia momoli iai latou uma i le isi itu o le asaga o Iapoka ae nofo na o ia i le isi itu o le vai. Ina ia mapu ane teisi seia ao. E le o taua mai i le tala pe aisea, ua nofo ai na'o Iakopo pau a le mea lea e manino mai le amataga o le fuaiupu e 22 le taimi lea e tupu ai le tala o le po.

Fai mai le tala ua la fagatua ma le tasi tagata ua oo ina ao. O le uiga o le upu fagatua o loo taua mai i le Tusi Paia palagi poo le NRSV o le wrestle. Pe mafai foi ona faamatalaina o se fusuaga poo se tauiviga i le va o ni tagata se lua. A o ai la le tagata lea e taua i le tala, molimau nisi o le au suesue o le Tusi Paia, o le agelu lea e tauivi ma Iakopo lea e taua mai i le Tusi Hosea 12:4, ao lea e faamanino mai e le Kenese o le tagata.

Leiloa poo le taimi lea na tuua ai na o ia, poo fai sana malologa, masalo foi poo sana miti na fai, lea na la tauivi ai ma le agelu seia ao. Poo le a lava lona faamatalaina, ae o loo aumai ai se tauiviga faa-le-tagata ma le Atua. Se tauiviga ina a umi. Se tagata foi ina finau tele.

O lona uiga, e le afaina poo le a le auala o loo faailoa mai ai le sui o le Atua. Ae o le mea e ao ona tatou iloa uma. O le Atua lava

lea ua faatasi mai i le tagata faaletonu, fefe ma le palaai. Sei avatu i ai se faamalosi, ma se faalototele.

A tatou vaavaai faalelei i le ituaiga finau lea na finau ai Iakopo. O le matua finau sopotuaoi lava. Ae a fua lava i le malosi faaletagata, e le ausia e se tagata ola aua ua aoina le po. Peitai o se isi itu, o se finau a se tagata palaai, tagata ua manumalo le fefe, i lona talitonuga o le tagata lava lea e maua ai se faamafanafanaga mo ia.

Poo a lava faigata o si toe avanoa lava lea. Sei faauta i le finau mauai o Iakopo. Fiu le tagata e fai atu e tuu o ia sei alu, ao lea lava e fagatua ma le tagata, ma le naunautaiga seia faamanuia mai ia te ia ona tuua lea e alu.

O le tagata e tauivi ma lototele, malosi e le matuugofie lona taofi. Tagata e faigata ona tuuaulafo ae maumaututu pea lona manatu ma lagona. Lea lava na tali i ai le tagata i le fuaiupu e 28 "...e le toe ta'ua lou igoa o Iakopo, a o Isaraelu, aua e pei o se alii ua e finau i le Atua atoa ma tagata, ma ua e manumalo ai..."

O le suia o le igoa o Iakopo, o se tasi o taeao iloga i le tala'aga o lona olaga; o le valaauina o se tasi tama iloga o Isaraelu. Ia tuu ese ia le Iakopo faitogafiti, sisi'o ma taufa'asese, ae suia ia Isaraelu o le tagata manumalo. O le tagata saili malo ona o le finau mauai.

O le fesili aisea ua tauivi ai Iakopo ma lea tagata poo le agelu foi? Silafia lelei e le Atua le mea oloo i le loto o Iakopo, o lona fefe i lona uso o Esau. Lea na toe faapupula iai le Atua ma auai mai ai o ia e ala i le tagata na ta'ua i le tala.

A lea ua faamanuia i ai le Atua, ua iloa ai e Iakopo le Atua ua la fesaga'i.

Ua tatou iloa ai foi o Iakopo o le tagata o faamanuiaga, tagata o loo auai ai le Atua. Le tagata o loo i ai lava i le laina o ona tuua o Aperaamo ma Isaako. Ma ia tatou manino ai foi e lei afaina i le Atua pe o ai lava le ituaiga tagata na te valaauina e faataunuu lona finagalo.

Faatinoga o le mataupu

1. Faamatala le tauiviga o lo’o taua i le tala?
2. Aisea ua leaga ai le sootaga o le auuso e pei ona taua i le tala?
3. Faapefea ona tupu se leleiga i se va o ni tagata se to’a lua?
4. le a le uiga o le upu tauivi, i luga o lou malamalama faa tama ma teine o le autalavou?
5. O le a se taimi e tupu a’e ai sootaga lelei i totonu o o tatou aiga?

Aotelega mo le taitai:

O ni sootaga lelei ma le leleiga moni e tupu mai le alofa tunoa o le Atua. E mapuna ae i totonu o se feeseeseaiga o ni tagata. I totonu o soo se mafutaga. Pei lava foi o le autalavou; a o’o ina feūa’i o tatou tua i le isi o tatou uso, ona fai lea ma avega mamafa ma faafitauli. Faasoa ma talatalanoa, ona tumau ai lea o sootaga e le mafai ona momotu e se tasi. Ae aui i aao agalelei ma aao faamafanafana o le Atua.

.....

Aso Sa: 27 Mati 2022 (ASO SA LAUPAMA)

**Mataupu: IA MANUIA LE AFIO MAI O LE SUAFA
O LE ALII**

Tusi Faitau: Luka 19: 28-40

Fesoasoani mo le taitai

O le faamamafa mo i tatou le Autalavou i lenei vaiata o le aga’i atu o Iesu i ona puapuaga; tatou te masani ai lava ona faalogoina

le i’uleo lea, “Ia manuia le afio mai o le suafo o le Alii” “Ia manuia le tupu ua afio mai” “Osana i mea aupitoaluga”.

O le Aso Sa ua fa’amanatuina ai le afio atu o lo tatou Ali’i o Iesu Keriso i Ierusalem, le a’ai na feagai ai ma ona puapuaga. O le fa’amoemoe fo’i lea o fa’avae ai molimau a le au fai-evagelia i lea lava malaga fa’atupu a Iesu i Ierusalem – le a’ai e ogatotonu i ai le ola fa’aleagaga o Isaraelu, ma lona Malumalu.

O le Evagelia a Luka lava ia ma lana molimau - O le afio atu o Iesu i Ierusalem – O le malaga lava a Iesu o le Tupu o le lagi ma le lalolagi. O le tupu ua afio atu e avatu le filemu ma le amiotonu i le lalolagi.

Ae tulaga ese le tapenaga o le afio atu o lenei tupu, e tusa o le tala a le au fai-evagalia. O tupu uma foi e taulamua tagata o le malo e sauni mea uma aua le fa’amoemoe ua maualuga. Peita’i, e le’i fa’apena ona fai. O tapenaga o mea uma ma le sauni atu i Ierusalem, sa faia lava i le pule fa’atupu fai-to’atasi a Iesu lava ia. E leai fo’i ni tonu tele, e na’o le fa’aloga lava o le Auso’o i le Ali’i ma fai loa mea na fa’atonuina.

Ona aumai lea o le asini. Ua latou lafo o latou ofu i luga o le asini. Ona latou fa’atietie lea o Iesu i luga o le asini. E na’o Luka foi o le au fai evagelia o loo fa’amatalaina ai lenei mea – a’o le fa’ailoga lenei o le taua tele ia Luka o lana lava molimau – O Iesu o IA lava o le tupu.

Talofa e, ia Iesu, e leai sana kariota e alu ai i Ierusalem e pei ona maua e isi tupu. Ua na’o le tama’i-asini lava ma lona papatua e ufiufi i ofu o tagata. Masalo ana i ai ni matai Samoa i lea aso po ua latou fa’apea ane; se pei oe se matai e le tautuaina.

Na lafo e tagata o latou ofu i le ala ae savali ai le asini o ti’eti’e ai le Ali’i. Fai mai Ioane na lafo fo’i e nisi o laupama, a’o Mataio ma Mareko fai mai o lala-la’au fo’i na lafo i luga o le ala. A’o va’aiga iloga ia o le afio atu o Iesu i Ierusalem i le mea o tuta i ai malaga uma, mo le fa’amanatuina o le tausamiga o le Paseka o tausaga ta’itasi.

Peita’i o ia lava mea uma, ma le gasologa o le fa’amoemoe o Iesu mo lona fia o’o atu i Ierusalem e tusa o le molimau a Luka lava ia, o loo atagia manino ai le agaga - o Iesu, o ia lava o le tupu. E

le soona vevesi vale le tapenaga o lona afio atu. A’o totonu o lona to’amalie, na alalaga leo-tetele ai lona Auso’o ma ana uo uma sa mulimuli ia te ia mai Kalilaia.

O le ata manino lona o le agaga fiafia o tagata i lo latou tupu ua afio atu. O le agaga fa’afetai ona o le mata’utia ma le silisili ese o mea ua faia e Iesu, le Mesia. Ua malolo le tagata ma’i fula; ua manuia le fafine na ma’i i le puna-toto; fa’aolaina le afafine o Iairo, ma le tele o isi galuega ofoofogia na faia e Iesu. Ioe, ua tatau le agaga fa’aeaea o le au So’o; ua onomea foi le loto fa’amalieina o tagata i galuega alofa na fa’atino e Keriso.

Fai mai le molimau a Mataio ma Mareko, ona alalaga lea o tagata, “Osana, ia manuia le afio mai i le suafa o le Ali’i.”(Mk 11:9). O le upu Osana e fa’auigaina, ‘ia fa’aola mai’. O lona uiga o loo o gatasi lava ma le fa’amoemoe o Luka, i le fa’atauaina o le mamalu fa’atupu o Iesu – aua o IA o le OLA na te fa’aola ma avatu le ola i tagata. O IA foi o le TUPU e afio mai i le Suafa o le Ali’i.

Faatinoga mo le mataupu:

A’o le fesili mo i tatou le au Kerisiano:

1. E ti’eti’e ea se tupu i se tama’i asini?
2. E tausaili ea se auala e fa’afeao ai se tupu mamalu?
3. A’o fea lona malo ma ona tagata e fitoitonu ma ia tapenaga masani?

Aotelega a le taitai:

Le tatou Autalavou e, o le faamalosi foi lea mo gasologa o fuafuaga o le Aso Sa o le Laupama, ua fia o’o atu le tupu i Ierusalemia i le mea o ogatotonu i ai le soifua fa’aleagaga o le nu’u. Ierusalemia o i ai le malumalu o le Atua e fa’amemelo i ai tagata. Peita’i, ua fai lava Ierusalemia ma fa’atafunaga o le ola ua pulea e le tiapolo ma le ali’i o le lalolagi.

O le ola o le Kerisiano fa’atuatua ua lofia e le agasala ma le tuinanau fia fa’amalieina o le tagata. Ua fia fotu-tupu Keriso i o tatou olaga, a ua fa’alavelave lava Satani i ai tatou. Le Ieusalemia lona ua fia fa’aolaina e Keriso ma lavea’iina mai le loloto o le agasala.

O le afio fa’atupu mai o le Ali’i i o tatou olaga e le mo’omia ai se lavelave o ni tapenaga – tau lava o le talia o Iesu i le loto fa’amaulalo e pule-fa’atupu o IA i o tatou olaga, ona faitalia lea o Ia ma tata’i lo tatou ala i le manuia e fa’avavau.

.....

Aso Sa: 3 Aperila 2022 (ASO SA TOE TU)

Mataupu: SAUNIGA O ULUA’I FUA

Tusi Faitau: Levitiko 23:10-11

Fesoasoani mo le taitai

I le vaai lava ia faa Eperu ma lo latou talitonuga, e fitu lava sauniga faapitoa. O le sauniga lona tolu lea ua faa ulutalaina o le Sauniga o le ulua’i fua, po’o le faapolopolo ia po’o le taulaga lulu i se isi faitau.

O loo fai mai le fuaiupu e 10 ma le 11, e fai i le Aso Sa le areto e le faafefeteina. E uma loa le paseka ona alu loa lea o le ositaulaga sili e nofo ese mai le nuu. O le taimi foi lona e sa ai ona pa’i se isi i le ositaulaga sili.

E uma loa le Sapati ona alu lea o le ositaulaga sili ma aumai fua i le malumalu ona talo lea e le ositaulaga i luma o le Atua. E uma loa ona talo ulua’i fua i luma o le Atua (i le malumalu) fa’atoā mafai lea e tagata ona pa’i i le ositaulaga sili.

Manatua le toetu o Iesu na tau tago atu ai Maria ia te Ia, ae fai mai Iesu “Aua le tago mai leaga e le i alu ane i lona Tama”

O le aso lava ia o le ulua’i fua (faapolopolo); o Iesu Keriso la o le Ulua’i Fua (faapolopolo) o le seleselega a le Atua.

Lea lava ua faamautuina ma faamausali e le molimau a le Aposetolo o Paulo 1 Korinito 15:20 – “A o lenei, ua toe faatuina mai Keriso i e ua oti, ua avea ma faapolopolo o e ua momoe”.

1 KORINITO 15:23 – “A e peitai e taitoatasi ma lona lava tofi; o le uluai fua o Keriso ia, mulimuli ane o e ua fai mona i lona toe afio mai”.

‘Feso’ota’iga o le Sauniga o le Ulua’i Fua ma le aso lenei o le Toetu Manumalo o Iesu’

Faatinoga o le mataupu:

1. Faamatala mai po o le a se sootaga o le ToeTu o Iesu ma le Feagaiga Tuai?

Aotelega a le taitai:

O lo’o faamanatu pea e le au Kerisiano lenei aso faapitoa e toe to manatu ai i le alofa tunoa silisili ese o le Atua i le lalolagi. Na afio mai ai e ala i lona alo pele o Iesu. Na militino ma le tagata agasala, o le faamoemoe ina ia tu mati’e lava le tagata. E ui lava ua mae’a le fia tausaga sa tupu ai lenei mea, peitai lea lava o lo’o manatua pea e le au Kerisiano. E manatua i le loto ma le mafaufau, ae ola ai pea le Agaga e o’o atu i le faavavau.

.....

Aso Sa: 10 Aperila 2022

Mataupu: MAPU ANE TEISI

Tusi Faitau: Kenese 24:1- 31

Fesoasoani mo le taitai:

O Elisara le auauna faamaoni a Aperamo, lea na auina e le toeaina i Mesopotamia e saili mai se ava ma lona atalii o Isaako.

Na tele tausaga o auauna Elisara ia Aperamo. O se auauna faamaoni ma le faatuatuaina i soo se mea e manao ai le toeaina. O le mafuaaga foi lea na ala ai ona tofia o ia e fai ma pule i auauna uma a Aperamo. Ae le gata i lea, ae o le faamaoni lava lea na afua ai ona ae se tofa i le toeaina, e avea Elisara ma ona suli na te faaauuina lona gafa i le lalolagi, ina ua vaai atu ua sau lava le matua, ae lei maua lava sona atalii.

“Maliu mai ia o oe ua faamanuiaina e le Alii, se a le mea ua e tu ai li fafo?” O upu ia a Lapana o loo faafeiloai atu ai ia Elisara le auauna tane a Aperamo ina ua taunuu lana malaga i le aiga o lona matai i Mesopotamia.

O le va o Kanana ma Mesopotamia, e tusa lea ma le 450 maila lona mamao. O lona uiga, e umi lava se taimi e alu ai se tagata i se feau ma toe foi mai. O le filifiliaina la o Elisara e faatino le manao o Aperamo, e le o se fuafuaga na fa’atagā faia, e le o se faamoemoe foi na faafuasei ona tupu, e leai, ae ua o se lavasiga ua leva ona afuafua i le loto o Aperamo, aua lava se to’alua o lona atalii. O le faatinoina la e Elisara o le manao o Aperamo, o le faatinoga na faia ma le faamaoni.

Afai tatou te vaavaai faale-maufau i le malaga lenei, o le upu moni lava, e le o se malaga faigofie, aua foi, e le gata ina mamao ma umi le ala, ae o le tele foi o fita ma faigata e fetai ai ma le tagata faimalaga. E le gata o le au faomea ma tagata leaga e osofaia ma faatamaia le faigamalaga, ae o le tele ma le anoanoai o faaososoga a nuu ma aai e ui ane ai le malaga e ono mafai ona lafotuina ai le faatuatua ma le faamaoni o le tagata malaga, ma iu ai ina ia lafoai ona faiva alofilima, ae fai le mea e loto iai le tama a le loomatua.

E le faigofie le feau lea ua auina ai nei Elisara, peitai, o le tagata faamaoni ma le tagata faatuatua i le Atua, o a fita ma faigata, o a faafitauli ma faalavelave, ao mailei foi ma faaososoga a le tiapolo, e le vaivai pe solomuli ai. Ae faatino pea le galuega, faatino le auaunaga ma le tautua seia tau i lona iuga, aua foi, o loo iloa mautinoa i lona loto, e le tuulafoaiina o ia e le Atua.

O le auaunaga ma le tautua e tautoaluaina e le Atua. Ma o le upu moni lava, a oo ina taunuu, e lagona le fiafia, e tupu le olioli, e

Iagona le agaga faafetai, e vivii foi ma faamanu I le Atua. Aisea? Aua o le alofa ma le agalelei o le Atua, ua ae malo ai le faatamasoalliiga a le auauna faamaoni.

A lea ua valaau mai le matai, “Maliu mai ia oe le ua faamanuiaina, se a le mea ua e tu ai I fafo?” O le valaau e mapu maia, sei fai se malologa ma se faasiliga malosi.

Mapu ane teisi sei fai se malologa. Mapu teisi sei fai se vai, ona toe faaauau ai lea o le malaga.

Faatinoga mo le mataupu

Fai se faatinoga a le Autalavou atoa e faatatau i tu ma aga faa Samoa. Manaia ae vaevae i ni vaega se lua, o le isi itu o le ‘au malaga, a o le isi vaega o le aiga po’o le nu’u.

Mo se faataitaiga, o le malaga a le ofisa o siosiomaga (MNRE) na alu i Savaii i Aopo e fia o i luga o le Mauga Silisili. Na o atu la le malaga afe i se tasi o aiga, mo se fesoasoai. O le a la le faiga o le valaau mo le ‘au malaga? E faapefea ona faa afe le au malaga? O le a le faatinoga o se feiloaiga pe afai o lea ua feiloa’i?

O nai faataitaiga na e taumafai ia atagia mai ai le uiga o le mataupu, mapu ane teisi. Ae pule lava lau susuga i le ta’ita’i o le Autalavou i nisi o auala e mafai ai ona faatino.

Aotelega a le taitai:

O le valaau mai o se tasi e mapu ane mo se faasiliga malosi, o le tau lea o le tagata sa galue ma o loo galue pea ma le faamaoni. Tofu i tatou le Autalavou ma taleni, o faiva foi ma tiute eseese ua tofiaina iai lou soifua ma lo tatou ola e le matai, tatou te galulue ai aua le atinaeina o aiga, o nuu ma le Ekalesia.

O le upu moni lava, e le o se mea leaga le mapu ane teisi mo se faasiliga malosi. Ao le fautuaga, ia mapu ane mo se faasiliga malosi, ia fai sina koma puupuu e faasauni ai mo isi feau. Ae le o mapu ane, ona mapu ai lava lea e le toe tu i luga.

.....

Aso Sa: 17 Aperila 2022

Mataupu: TEPA TAULA’I IA IESU

Tusi Faitau: Eperu 12: 1-4

Fesoasoani mo le taitai

E ui ina e lē o mautinoa lē na tusia le tusi ia Eperu, ae ua manino ma mautinoa le fa’amoemoe ma le naunautiga o le tusitala: o le ofoina atu o ‘Upu apoapoa’i’ mo le au fa’atuatua i le Atua (Eperu 13:22

E eseese lava fo’i talitonuga i le taimi na tusia ai lenei tusi, ae peiseai o se talitonuga ua talia lautele, o se tusitusiga na faia fa’ataua lava mo le au fa’atuatua Kerisiano sāuāina (5:12; 10:32-34; 12:3ff) mai le ogatotonu o le ulua’i seneturi o Tausaga o le Alií, aga’i atu i lona tau fa’ai’ui’uga.

O le tusitala lava ia ma le au’ililiina o lona fa’atuatua fa’atagata talitonu i le Atua, o lo’o matua manino i le gasologa atoa o le tusi lenei i le au Eperu.

O le tasi o manulauti o lenei tusiga a le tusitala – e pei ona faámauina i le Mataupu 7 - 10, o loo ia faámatalaina ai le natura ma le atoatoa o Iesu Keriso ma lana galuega.

Le fa’asinomaga manino lena e afua ai le molimau loto tele a le tusitala, ma ua fai ma auala e ta’utino ai foi ma lona fa’atuatua manino ma lona fa’amoemoe mautinoa i le soifua mamā, soifua tauivi, le soifua onosa’i ma le fa’apalepale o le Ali’i o Iesu e tulaga ese ai o IA mai tagata uma

.Pe a faitau i le mataupu 11 o i luma mai o le mataupu lenei, o loo folasia ai e le tuistala sina tala’oto’oto, ae manino, o le ola fa’atuatua o le fanau a le Atua i le Feagaiga Tuai e i ai Apera’amo, Apelu ma isi.

O i latou o fetū pupula o le mea e ta’u o le ola fa’atuatua i le Atua. O se ata o le naunau o le tuistala e fa’atumauina ma tau’ave pea lena fa’atuatua i loto ma olaga o tagata Kerisiano o ona fo’i taimi. O lona uiga, ia ave galuega lelei o le fa’atuatua o tagata o

le Feagaiga Tuai, e fai ma ta'iala manino mo tagata uma. Ia tuliloa ma fa'a'au'auina pea lena olaga lelei i taimi o sauaga a le lalolagi aemaise le malo o Roma sa pulea tagata i lena taimi.

O Tagata iloga na o le Feagaiga Tuai o lo'o fa'aigoaina e le tusitala o le 'fa'apotopotoga o tagata e to'atele o ē matamata mai' e ui ona ua fai'ilagi le folauga. Matamata mai i le a? O loo matamata mai i le ola fa'atuatua o tagata o le Feagaiga Fou o loo ola fa'atasi ma le tusitala – pe seā le fa'atinoga o lo latou fa'atuatua, pe peī le onosa'ī i taimi o fa'aosoosoga pe a lūiina e puapuaga o le olaga. I le manatu o le tusitala - o le onosa'ī o le tagata i puapuaga ma le lu'i mai o le agasala, o tafa iloga ia o le olaga o le tagata fa'atuatua e tatau ona u'a lelei ma ia lavātia ona tau'ave i taimi uma o o latou olaga.

A ua mautinoa lelei e le tusitala, le faigata ona fai o lea mea. E le faigofie i le tagata soifua ona tumau i le onosa'ī ma le fa'apalepale fa'ale-Atua; se'i vaganā lava ua i ai se ta'iala malosi ma le fa'amoemoeina e taula i ai mafaufauga ma olaga o le au Kerisiano. O le ala lena na ia apoapoa'i malosi atu ai i le au Kerisiano, "ia va'ava'ai atu ia Iesu". E va'ava'ai e a ia Iesu? O Iesu, o IA o le fa'ata'ita'iga sili ma le manino o le olaga fa'a-kerisiano mo'omia i taimi uma.

Galuega Fa'atino:

1. E faapefea ona iloa ma manatua oe e tagata pe a mavae lenei olaga?
2. Faapefea ona tatou tepa taulai ia Iesu, pe afai e le o vaai e o tatou mata se Iesu?

Aotelega a le taitai:

O lo'o sapi Samoa i lona fa'avae – 'E fa'avae Samoa i le Atua'. O lona uiga o le Atua e tatau ona va'ai tasi i ai Samoa mo lona manuia ma lona lumana'i to'afilemu. Peita'i, ua va'ai Samoa i Casino ma isi mea fa'apena e saili i ai lona malosi ma lona tamaoiga.

O le lu'i lea mo i tatou le au Kerisiano o lenei fo'i senituri. Pe mafai ona tumau i tatou i le fa'atuatua i le Atua? Pe mafai ona tatou onosa'ia tiga o le ola fa'apaiaina ma fa'amā'umā'u pea i le fa'atōatōa i puapuaga o le malo o le Atua? O fesili tetele na o le ola – e tauivi pea ma le tagata kerisiano.

.....

Aso Sa: 24 Aperila 2021

Mataupu: VIVI'I I LE ATUA

Tusi Faitau: Luka 1: 30 - 56

Fesoasoani mo le taitai:

E lei faigofie ia Maria le pa'i atu o le fa'aaliga a le agelu o Kaperielu ia te ia,

“ Maria e, aua e te fefe aua ua alofaina mai oe e le Atua. Fa'auta foi, o le a to oe, ma e fanauina se tama tane, e te fa'aigoa ia te ia o Iesu” (30-31)

E le'i tupu muamua se mea fa'apea i le olaga. Aemaise o lea ua ta'utino e Maria i le agelu, e na te lei iloa se tane. Fa'a mata o lea se lagona o se tamaita'i Samoa i lenei fa'aaliga a le agelu pe ana o oe o Maria. O a ni upu a tagata Samoa i se mea fa'apea e tupu i se taupou iloga o le atunu'u. E le faigofie nei fesili? A'o fesili nei e mafai ona oo mai i o tatou foi tagata ma la tatou fo'i aganu'u pe a faitau i lenei molimau a Luka.

Ae ua tatou maua i lenei taeao le tala i le olioli loloto fa'ale-agaga na o'o i ai le taupou o Maria i le fa'aaliga a le agelu. Le agaga fa'agaetia lea na afua ai ona ia fa'apea ane,

“Ua vivi'i atu lo'u loto i le Ali'i, ua olioli foi lo'u agaga i le Atua lo'u Fa'aola, aua ua silasila mai o Ia i lana auuuna fafine ua fa'amaulaloina...” (f 46-48).

O le fuaiupu e 46 –56: o loo fa'amauina pea e le au su'esu'e o le Tusi Paia, o le “Pese a Maria” . E peiseai e foliga tutusa le pese

lenei a Maria ma le “Pese a Hana” o loo maua i le 1 Sam 2: 1- 10. E mafai ona fa’apea se manatu e tolu ni mafaufauga taua lava o loo fa’amamafaina e Maria i lana pese lenei.

1. Ia viia le Atua ona o lona amanaiaina o lona tagata fa’atauva’a e fai ma auala mai o le fa’aola o le lalolagi, le Ali’i o Iesu.

2. Ia vi’ia le Atua ona o lona agalelei i tagata maulalo, fa’atauva’a, matitiva ma le aloaia i le sosaiete. O le li’o lea o tagata o loo i ai i totonu ma Maria ma lona aiga. O le vaega lea o loo mamafa i ai manatu o Maria e pei fo’i ona pese Hana i lona agaga fa’agaetia i le Atua.

3. O le fa’afetai i le Atua ina ua ia fa’ataunu’u lana folafolaga (promise) i augatama o lona nu’u Isaraelu na te lavea’i ona tagata; ma alofaina i latou uma e tupuga mai ia Aperamo. O lona uiga o le alofa lea o le Atua ia Isaraelu e tupu mai ai le Fa’aola o le lalolagi, mai le fanau a Aperamo ma le laina o Tavita.

O lona uiga e mafai ona tatou fa’apea ane, o le pese lenei a Maria, o le pese lava o le manumalo mo le tagata fa’atuatua i le Atua. O le tautinoga e tupu mai i le loto ua taumasuasua i le fiafia i mea alofa a le Atua i lona olaga.

Leitia ona pese Maria. Leitia ona vivi’i le tagata fa’atuatua e sula le Alofa matalasi o le Atua. O lona uiga o se mea lava e ao ona mafaufau loloto pea i ai le tagata Kerisiano fa’atuatua. O le faia e le Atua o se suiga fou ofoofogia i o tatou olaga, o le a fa’atupuina ai pea le fiafia ma le fa’amoemoe ola. Mai i totonu o lona fiafiaga fa’ale agaga, e tupu a’e ai le agaga fa’ane’ene’e i le Atua.

Tele taimi o le olaga tatou te tali ta’oto ai fa’amanuiaga a le Atua mo i tatou. E peiseai o le ola ma le malosi o le tagata ua na o ni mea lava e tupu fua i le olaga. O le mauaina fo’i o fanau i totonu o aiga ma lo latou tutupu a’e i le manuia i aso uma, ua peiseai ua na o ni fua o ni galuega masani a le tagata soifua.

A’o gasologa ia o le olaga ole tagata soifua, e ao lava ona mafaufau loloto pea i ai. O le mea mautinoa, e le o so tatou malosi, e le o so tatou atamai, e le o so tatou tamaoaiga fo’i ua tele, ua mafua ai. Ae peita’i o le mana fa’aola o le Atua mo lana

tagata na fai, o le malosi lilo lea e na te fa’atupu mea fou ma le ofoofogia i o tatou olaga.

Galuega faatino:

1. O le a le ituaiga tusitusiga e iai le tatou mataupu mo lenei aso?
3. Aisea ua vivii ai le loto o Maria?
4. Ae a i tatou le autalavou, o le a le taimi e te vivii ai i le Atua?
5. Faapefea ona vivii i le Atua?

Mafaufau loloto i tatou le autalavou; ae faapefea la le tagata e le ola vivii i le Atua? Manaia foi ae fai se tatou faasoa, e tatala mai ai mafaufauga o le autalavou, ina ia tulimata’ia pea le uiga o le vivii i le Atua.

Aotelega a le ta’ita’i:

O le viiga lava ia, ua na o le Atua Silisili tatou te sula lona Alofa ma lona Agalelei. O a taleni ma agavaa ua maua e i tatou le autalavou, ‘aua nei e mitamita iai, a ia fai ma viiga sili o Atua. O i tatou ua na o ni tausima mea o le foafoaga, e ofo atoatoa lo tatou ola, ina ia viia ai le Atua i so’o se ala. E eseese auala e viia ai le Atua, a o le sini autu, ia faaneeneina ma faamanuia lona Suafa Paia.

.....

Aso Sa: 5 Iuni 2022

Mataupu: O LE MALO O LE ATUA I LE LALOLAGI (Kingdom of God on earth)

Tusi Faitau: Luka 17:20-21

Fesoasoani mo le taitai

O le talitonuga masani lava o tatou, o le malo o le Atua o loo i lugā i le lagi. E moni ma faamaoni lea faaupuga.

Ae ia fesili oe ia te oe, o le a le uiga na afio mai ai le Atalii o le tagata i le lalolagi? E lei sau se Iesu e eva. Na afio mai ma le faamoemoe. O le faamoemoe, ia aumai le malo o le Atua I le lalolagi.

O le malo o le Atua, o lo o faatusa i le **pule aoao** a le Atua. O le upu Eperu o le ‘malo’, o le *mulkuth*. O le upu Eleni, o le *basileio*. A tuu faatasia uiga o gagana ia e lua, o loo faamatalaina e faapea, o le *reign, kingship, authority* o le Atua.

E le o faatatau na o se nofoaga o le ‘au paia i luga i le lagi. O le pule a le Atua, e iai foi i le lalolagi. O fea la o lo o i ai lea pule? O le **loto** o le tagata. Fai mai Paulo o a tatou tino o le malumalu e afio ai le Atua. O le aso o le Penetekoso na afio mai ai le Agaga Paia, e faatasi iai tatou seia oo i le faavavau. O le agaga lea o Iesu Keriso. O le malo lena o le Atua o loo i totonu ia te oe ma au.

O le uiga foi lena o le tatalo na aoaoina mai e Iesu i ai tatou. *Lo matou Tama e, o i le lagi. Ia paia lou suafa. Ia oo mai lou malo. Ia faia lou finagalo I le lalolagi e pei ona faia i le lagi.*

O le ‘pule’ lea a le Atua e tatau ona tatou augani iai pe a tatou tatalo i le Alii. O le pule o le filemu, fealofani ma le alofa ia tumau i o tatou loto, ina ia faatino i totonu o lo tatou sosaiete o loo tatou galulue ma ola ai nei.

Faatinoga o le Mataupu – Group Activity 30mins

O lenei galuega faatino, ia faailoa mai e le vaega le uiga o le Faataoto a Iesu, o loo faatatau i le malo o le Atua i le lalolagi.

Ia tali fesili nei:

- O le a le uiga o le Faataoto?
- O le a se faatatau o le Faataoto i le va fealoai o tagata ma le foafoaga?
- O le a foi se faatatau o le Faataoto i le Ekalesia?
- O le a se feau mo tatou tupulaga talavou?

Vaevae le autalavou i ni vaega se 3

1. Ia tofu uma vaega ma se pepa e faamau ai i lalo o latou tali.
2. **Group 1** – Mataio 13:1-9 – Fa’ataoto i le tagata lulu Saito (*Parable of the Sower*)
3. **Group 2** – Mataio 13:31-32 – Fa’ataoto i le fua o le Sinapi (*Parable of the Mustard Seed*)
4. **Group 3** – Mataio 20:1-16 – Fa’ataoto i le Tovine (*Parable of the Vineyard*)
6. Ia faitau ma **malamalama** vaega taitasi i lo latou Faataoto ua tuuina atu, ma tali fesili ua faailoa atu i luga.
7. Toe faapotopoto mai le autalavou ma faailoa le uiga o latou Faataoto ma tali o latou fesili.

Aotelega a le Taitai

1. O le malo o le Atua, o loo faatatau i lana ‘pule’ i lugā ma lalo nei. *Kingdom of God is referring to His reign, kingship and His authority.*
2. O au galuega alofa e te faatino, e iloa ai o oe o le tagatānuu o le malo o le Atua i lalo nei. *Your good deeds and your Christian ethical behaviour, shows that you are a true citizen of the kingdom*
3. O le malo o le Atua o lou va fealoai ma tagata faapea foi ma le foafoaga. *Relationship with others and the creation*

.....

Aso Sa: 12 Iuni 2022

Mataupu: O LE ĀVA FATAFATA(Respect)

Fesoasoani mo le taitai

Ae lei taunuu mai le Tala Lelei i Samoa, sa i ai lava tu ma aga faanuupo e le tau faailoa atu. Sa masani lava tagata Samoa I ia ona po, i le soesa. E faatutupu o latou ‘ava.

Taunuu mai misionare papalagi, na latou suia ai le vaaiga faapaupau lea e tusa ma o latou silasila. Lea lava o loo pepese mai le aufaigaluega faapea ma o tatou mātua, ia tausi tu ma aga ia i tupulaga Samoa i lenei vaitau. Ia ‘auli ma fai faalelei laei

Peitai ane, ua le o toe faamamafaina. Aua o loo vaaia pea i nei aso i tatou tupulaga o loo faataitai lava i mea faanuupo. O le fesili tele, pe aisea?

Ua i ai foi mātua e otegia i le fanau, ae oso mai le tamaititi ma fai mai, *e le o fafo a’o totonu ia mama*. Ua pei o se ‘alofaga i tamaiti po o tupulaga i nei ona po, le faaaogaina o afioga a le Atua e pupuni ai o latou tuinanauga.

Faatinoga o le Mataupu

O se avanoa foi lea e **faamanatu** ai i le autalavou le taua o le **faaaloalo i le Atua ma soo se tagata** i totonu o le malumalu ma poo fea lava le mea agai ai le soifua ma le ola. O nai faafitauli nei ua tulai mai i totonu o tupulaga talavou:

1. **O le Soesa** – Ua fiafia e faatupu le ‘ava e tau lelei i lalo o le fatafata.

2. **O le Fa’asoesa** – toatele tupulaga ua pei o se mea fiafia le soona pisa i totonu o se nuu. Fiafia e ‘e’e solo, ma soona tuu i luga le leo musika ia faalologa mai tagata. Ae o loo i ai foi nai tama ma tina matutua, faapea foi ma failele o loo malolo lelei ona ua le o atoatoa le malosi. *This is disturbing the peace.*

3. **O lavalava** – o nisi ua le tuu faalelei i totonu o latou ofutino paepae pe a sulu o latou ie i le lotu. O nisi foi ua le sele faalelei le fusiua, pe faamau le faamau i pito i luga o le ua o le ofutino. O nisi foi e iloa atu le ofu tusitusi i totonu o le ofutino. Ua i ai foi nisi o tupulaga, a fai toonai po o aoga pese, ua o mai ma ofu e leai ni lima (*singlets*).

4. **O tamaiti** – E iai lava tamaiti laiti faapea foi ma pepe ua soli le aufaipese, i taimi e usu ai pese o le tapuaiga. Ua fai ma faalavelave i taimi o loo taumafai le agaga e fesootai ma le Atua. O nisi foi ua soona soli le fale o le faifeau.

5. **‘Ava malosi i totonu o le lotoā** – ua iai foi nisi tupulaga ua tagofia le ‘ava malosi i totonu o le lotoa o le malumalu.

6. **Aganuu** – o lau tu, savali, nofo, ma le tautala, e iloa ai o oe o le Samoa. Ua toatele tupulaga a ō e faatau i le faleloa, ma ‘ai savali i luga o le ala. Toatele foi tupulaga talavou, ua le iloa tausi le va ma tagata matutua. O le gutu oso, ma palalauvale i tagata matutua. E oo foi pe a fai toonai o le ‘aulotu, ua le iloa ona fai le upu – ‘tulou’.

Fesili mo le Autalavou:

O le a le mafuaaga ua ala ai ona fiafia tupulaga e fa’aali mai o latou tifiga i totonu o le falesa ma soo se mea lava?

E i ai se aia tatau o le tamaititi i totonu o le aiga? *Do they have a right to walk, talk, dress however they want?* Auā o le aganuu faa-Samoa, e leai se aia tatau o le tamaititi. Na o le faalogo ma usitai. O le aia tatau o le tamaititi, e fetau i tu ma aga lena o le palagi. Aua o atunuu i fafo, e 18 loa le tamaititi, ona faataga lea o le inu ma alu ese mai le aiga. Ua tuu i lona faitalia. Ae o le Samoa, e te i lalo o ou matua seia oo i le oti. Vaai po o a mea lelei ma mea faalēlelei o le aia tatau o le tamaititi.

Aotelega a le Taitai

E iloa o tatou o fanau o le Tala Lelei i lau tu, savali, nofo, ma lau tautala.

Ia toaga e a’oai lou mafaufau *discipline your mind* e tusa ma tu ma aga faa-Kerisiano e pei ona faatonuina ai i tatou e o tatou mātua ma faifeau.

O iina e iloa ai foi, lou ituaiga fale a’oga. Ma lou fa’aaloalo i le Atua, le va nonofo ai ma tagata, e le gata I totonu o aiga ae faapea foi i soo se mea e te alu iai. *We must be mindful of our actions. Act like Christ!*

.....

Aso Sa: 19 Iuni 2022

Mataupu: O LOU TINO O LE MALUMALU A LE ATUA (*Your body is God’s temple*)

Tusi Faitau: 1 Korinito 6:19-20

Fesoasoani mo le taitai

O le feau taologologo lava lea o le aufaigaluega i aso Sa taitasi – ia malosi lou itu faaleagaga. Aua o le tino e pala, ae o le agaga e sao i luga i le lagi. Pei o le uiga lena o le tala a le Aposetolo o

Paulo i le Ekalesia i Korinito. Aua nei tiai solo lou tino i tuinauga o le lalolagi e pei o le faitaaga, onā, matapeapea, o le fao mea, ma le tele o isi amio faasotoma, auā o lou tino o le malumalu e afio ai le agaga o le Atua.

Peitai, o le faamamafa o lenei mataupu, o le tausiga o lou soifua maloloina e tatau ona faatāua. A tatou mafaufau i le tele o ma’i ua aafia ai le soifua o le Samoa e pei o le *obesity, Alcohol and Drug Abuse, etc...* o iina e iloa ai e le o faatāua lou tino e afio ai le Atua.

E i ai le upu masani e faapea, *you are what you eat*. O lona uiga, afai e te fiafia e te tausami i meaai ga’oa ma inu i le Coca-cola i le tele o taimi, afai foi e te faaoga le tele o fualaau faasaina ma le soona inu ia tau le ua lou onā, e le mafai ona maua le mafaufau lelei, e le mafai foi ona e maua le malosi e faia ai se galuega.

O le lē mafai ona tausiga o tatou tino, e tupu ai le paie ma le augata. E aafia ai foi ma au faaiuga e te faia i lea aso ma lea aso. *Junk mind and junk body can contribute to a lot of killings, rape and other uncivilised acts that we see in our society*. E le gata I lea, ae e aafia ai ma lou itu faaleagaga.

Ia malamalama le autalavou i le taua o le tafatolu o le tagata. O le mafaufau, tino ma le agaga (*Mind, body and soul*). E tatau ona paleni mea uma ia e tolu. Afai o la le agaga e tatau ona faamamafa i le tagata Kerisiano, e tatau foi ona galue o tatou mafaufau ma le tino. Ma o lenei aso Sapatu, ua tatau ai ona faamamafa le tausiga o le soifua maloloina o tatou.

God gave us a body to look after, exercise it, give it rest, and feed it, so that it may grow in the mind and spirit.

Faatinoga o le Mataupu- Fa’asoa

1. O le a le fesootaiga o le itu faaleagaga ma le itu faaletino?

2. E mafai ona e faatāuaina le itu faaleagaga nai loo le itu faaletino? **Faamatala.**
3. Ta’u mai po o a mea e fetau, ma mea e le fetau mo lou soifua maloloina.
4. O a ni issues/faafitauli e te iloa i totonu o lou siosiomaga ma le sosaiete, ua aafia ai le soifua maloloina o tagata i nei Samoa? Ae o le a lona mafuaaga?
5. O le a se lu’itau mo tatou tupulaga i nei ona po?

Aotelega a le Taitai

1. E mamalu le agaga, pe a fua i mea e faia e le tino.
2. ‘Aua le soona tausasami i mea lololo, ma inu i vai suamalie – e tupu ai lou paie ma le augata e fai le galuega a le Atua. *Detox yourself **physically, mentally, and spiritually** then you will feel energized to do God’s work.*
3. Ia paleni lou vaai o le tino ma le mafaufau, ona faapena lea ona galue le agaga. *Your spirit will be healthy when you look after your mind and body.*

.....

Aso Sa: 26 Iuni 2022

**Mataupu: O AI IESU IA TE OE?
(Who is Jesus to you?)**

Fesoasoani mo le taitai

Ua iloa uma e tagata o Iesu o le Alo o le Atua, ma le uiga o lona afio mai. Ae o le mataupu leni, ia faailoa mai e le autalavou, po o ai Iesu i a te ia I le taimi leni. *Who is Jesus to you personally?*

A faavae lo tatou malamalama ia Iesu, e ala i ana aoaoga o loo i totonu o le Tusi Paia, o le a se uiga loloto o Iesu I le taimi leni I tupulaga talavou?

- Is Jesus your friend? Or not?
- Is he your brother?
- Can Jesus be your uncle or grandpa?
- Is Jesus seen in our society today? And how?

O nai fesili ia, e fesoasoani e faatupu manatu i le autalavou, ina ia fesootai le Keriso, ma i tatou i leni lalolagi. O le faamamafa mo le autalavou, o le va fealoai, po o le **relationship with Christ**.

E lelei pea ona tapena i ai lau Susuga i le taitai, aua, afai ua iai se fesili e laga mai e se tagata o le autalavou, faapea e le mafai ona avea Iesu ma au uo, aua o le uo e mafai ona e foa ai. **O lau tali:** *O Iesu o le uō lelei e le foa ai se tasi. O se faataitaiga lelei lena, i le mafutaga faaleuō I totonu o le sosaiete o loo tatou ola ai nei.*


Faamanatu atu pea, o au tali pe a fesili mai nisi, ia matietie pea le tulaga o Iesu i totonu o le mafutaga faalotoifale.

Faatinoga o le Mataupu – Group activity 20 mins

1. Ia vaevae le autalavou i ni vaega se 3.
2. Ia tofu uma vaega ma le A3 paper ma le whiteboard marker.
3. Filifili lava e le vaega se mataupu e iloa ai lona va fealoai ma Iesu. *For example, O Iesu o le ki o le faitotoa, O Iesu o la’u uo, O Iesu o le fugalaau matala, etc...*
4. Tusi le mataupu ua filifilia, i le ogatotonu o le pepa A3
5. O luga, lalo ma autafa o le pepa o loo avanoa, tusi I lalo na o mea taua, e faamatala ai le uiga o le mataupu ua e filifilia, e faatatau I le uiga o Iesu ia te oe.
6. Faapotopoto mai vaega taitasi uma.

7. Filifili lava e le vaega se tagata o le a faailoa *present* o le latou vaega.

Note – Silasila ane i le faaitaiga ua tusia i lalo:



Aotelega a le Taitai

1. E iloa Iesu i totonu o lou lotoifale
2. E taua Iesu i lou olaga, e atagia i lou mafaufau, tino ma le agaga
3. O au galuega alofa e te faia i isi tagata, e iloa ai o Iesu o loo i totonu o oe.

.....

Aso Sa: 3 Iulai 2022

Mataupu: AMIOTONU (*Righteousness*)

Tusi Faitau: 1 Peteru 3:13-17

Fesoasoani mo le taitai

O le amiotonu po o le *righteousness*, e sau mai le upu ‘sa’o’ po o le ‘*right.*’ O lona uiga, o le tagata e tumau lona loto i le Alii, o se tagata e amiotonu lena. se mataupu e ese le taua mo tatou i lenei vaiata. O le fesili tele, e mafai ona amiotonu le tagata? E mafai. Ae ia tatou manatua o tatou nao ni tagata. E le faavavau lo tatou amiotonu. Na o le Atua lava e mafai ona amiotonu seia oo i le faavavau. Ao le tagata, e iai lava le taimi e gata ai lona malosi. E iai le taimi e pi’opi’o ai, ae e iai foi le taimi e amiotonu ai.

Toatele o tagata ua fai mai e le mafai ona amiotonu le tagata. O tatou lava filifiliga, ua tatou leaga ai. E le avea foi le mafaufauga faapea, e fai ma ‘alofaga e taofi ai le mea moni e tatau ona fai. There is no excuse.

O le faamalosi au a Peteru, ina ia tumau pea le faia o le amiotonu. Afai tatou tigaina i le faia o le amiotonu, sala ua tatau. Aua o le tagata Kerisiano lava ia, e tumau lava i le mea moni mai le Atua. E pei ona fai mai Peteru, o le soifua foi lena na soifua mai ai lo tatou Alii Faaola o Iesu Keriso. E lei fefe i tagata. Ae na usitai lava ma mauaa pea lona faatuatua i le e ana le feau.

Faatinoga o le Mataupu:

O le faatinoga o lenei mataupu, o le tuuina atu se tala (*case scenario*), ina ia faitau ai le autalavou e faatatau i le mataupu o le ‘amiotonu.’ Ma tali le fesili o loo i lalo

Sa faia se fonotaga a le Ekalesia ina ua maea le sauniga lotu i le Aso Sa. Ona tulai lea o le Faafeagaiga e faailoa atu i luma o le Ekalesia, se mataupu e uiga i le teutupe o le aulotu na ia gaoia ai le \$5,000, ma sola i Iapani. Ua tagi le Faafeagaiga i le alofa i le tautiga o le aulotu. Ona tuu atu lea o le avanoa i le aulotu, sei fai so latou faaiuga i le Teutupe a le Ekalesia.

Ona tulai atu lea o se tasi tiakono ma faapea, “*E tatau ona logo le ofisa o leoleo, e sue le tagata lea, ina ia mafai ona molia i le faamasinoga.*” E toatolu tagata na lagolagoina le manatu o le tiakono.

Ae tulai mai i luga se tasi faletua ma tagi i le faanoanoa, ma faapea atu, “*Lau Susuga i le Faafeagaiga ma le faletua, faapea le mamalu o le tatou ekalesia, o fea o iai le tofa ma le utaga? Ia tatou faamagalalo ia lenei auauna ua ia faia lea amio mataga. Ia tatou tausia pea le filemu ma le fealofani ma le loto faamagalalo.*”

E foliga mai ua ‘autasi uma le Ekalesia i le manatu a le faletua. Ona nofonono lea o le Faafeagaiga ma mafaufau.

Fesili:

Ia tuu oe i totonu o le tala leni. O fea o nei manatu e te iloa e amiotonu? Aisea?

Aotelega a le Taitai

- Fai mai Peteru i le fuaiupu e 16, “Ia ia te outou le loto fuatia ifo lelei.” *Keep your conscience clear.* O lona uiga, ia e atamai i au faaiuga e te faia ma le amiotonu.
- E tatau ona fai se faaleleiga (*reconcile*) muamua ma lou uso na ia faia le agasala ia te oe, po o oe foi ia te ia, ae lei ave faamataupu i le toeaina o le pulega. *Church matters can be dealt within the very Church of Christ. The church*

can be the Court also. O le uiga lena o le fetalaiga a Iesu o loo ta’ua i le Mataio 18:15-19. O le aoaoga lena a Iesu i faafitauli faapenei. O le auala foi lea o le faatinoga o le faamagaloga i e o loo faia lea amio, nai loo le tau ma sui. Afai e le maua se faaleleiga, ua tatau loa ona ave i le faamasinoga (*Court*), auā, o iina foi o loo taoto ai le pule a le Atua (*God’s authority*).

.....

Aso Sa: 10 Julai 2022

**Mataupu: O LE MANA O LE FAAMAGALO
(The power of forgiveness)**

Tusi Faitau: Mataio 18: 21 & 22

Fesoasoani mo le taitai

E le o se mea faigofie le faamagalalo i se tasi sa agaleaga ia te oe. Masalo foi e faigata foi le faamagaloina o oe i au foi amio leaga sa faia i lou uso.

Ae o fea e sau ai le mana o le faamagaloga? Afai o tatou tatalo o loo auina mai ai le pule a le Atua e faatino ai le galuega alofa i leni lalolagi, o lona uiga, o le mana a le Atua o loo i totonu ia te oe ma au. O lona uiga foi, o lou lava faitalia i le fa;aaogaina o le mana a le Atua e te faamagaloina ai tagata.

O le mafuaaga e tatau ai ona tatou faamagalalo i tatou uso o loo faatuiese ma agaleaga ia te oe, ina ia tausia le **filemu**. O le aoaoga foi lena o Iesu i ai tatou, ina ia ‘aua nei tau ma sui. Afai ua tatou iloa o le Atua o se Atua alofa, e tatau foi ona tatou mulimuli I lea ala e pei ona faasino mai e Iesu.

O le uiga o lenei faatinoga, ia iloa e le autalavou, pe mata e faigofie ona e iloa le sesē o le isi uso? Ma poo e malamalama i latou foi faafitauli?

O le faatinoga lenei, o se auala e mafai ai ona tatou malamalama i le taua o le faamagalo i lou uso, ma fesoasoani i lo tatou vaivaiga o le faamasino atu ma agaleaga atu i tatou uso a tagata. Mulimuli i le faatinoga o loo ta'ua i lalo.

Faatinoga o le Mataupu - Bible game

- Ia tufa pepa i le autalavou, pe tusi foi i luga o le laupapa ia faaupuga o loo ta'ua i lalo.
- Taumafai ia **kolosi** faaupuga o loo **sese**. *Cross out the false statements ONLY.*
- **Fa'asa le internet please!!!**
- **Fa'asa foi Tusi Paia please!!!**

WHAT'S WRONG??

1. The Pacific Ocean is the largest ocean in the world.
2. $19 \times 18 = 361$
3. O Saulo na fanau i Tamaseko
4. The following letters are classified as consonants
– A E I O U
5. O le upu teu loto o le olimipeka o le CITRUS,
ALTIUS, MORTIUS
6. E 31 aso i le masina o Iulai.
7. Plannet mercury is closet to the sun.
8. O le tinā o Solomona o Uria.
9. Amuia e loto mama, aua latou te iloa atu leAtua.
10. Three of Santa's reindeer have names beginning with the letter D

- A maea le faatinoga o lea vaega, ona faailoa atu lea e le ta'ita'i o tali o faaupuga o loo i luga. Silasila i tali o loo i lalo:

ANSWERS

1. Sa’o
2. SESE! – 342
3. SESE! – na fanau i Taso
4. SESE! – They are vowels po o vauei. E le o ni konesane.
5. SESE! – Citius, Altius, Fortius. O lona uiga, faster, higher & stronger.
6. Sa’o
7. Sa’o
8. Sa’o
9. Sa’o
10. Sa’o

➤ A uma loa ona faailoa tali sao ma tali sese i le autalavou, ia latou tali fesili o loo i lalo.

1. Na faigofie ona iloa mea sese? Did you find it easy to spot to the mistake?
2. O le a sau lagona pe a fa’asa’o e oe se mea sese a se tasi? How do you normally react when you spot other peoples mistake?
3. O le a sau lagona pe a fa’asa’o e se tasi au mea sese? How do you normally react when people spot your mistakes?
4. Po o le a foi se lagona a le Atua pe afai tatou te faia lea mea sese? How do you think God reacts to our mistakes?

Aotelega a le Taitai

O loo fai mai le Tusi Paia o tatou uma o tagata agasala. O le iuga o le agasala o le oti. Ae ona o le alofa tunoa o le Atua ia Iesu Keriso, ua tuu avanoa mai pea o ia i ai tatou. O lona uiga, e tatau ona tatou faamagalo i le tasi. Aua o oe foi e te agasala. Aua nei tusitusi lima pe faamasino foi i lou uso, auā e te le o iloa ma malamalama i faafitauli o isi tagata. Ina nei ui atu ia te oe le mata o le pelu, i se leaga na e fafauina. O le fua e te fuaina atu, e toe fuaina mai ia te oe.

Ae ia tatou lagona le loto faamagalo, e mafai ona toilalo ai le tau ma sui, ae faeaina ai le filemu ma le fealofani. *It is your choice to forgive others, but if you choose God’s way, you will understand the power of forgiveness.*

.....

Aso Sa: 17 Iulai 2022

**Mataupu: O LE MANA O LE TATALO
(The power of prayer)**

Fesoasoani mo le taitai

O se tasi leni o auupega o le taua faaleagaga o le tagata Kerisiano – o le tatalo. O le tatalo o le fesootaiga lea o le tagata ma le Atua i la le agaga. Ua toatele ua faaogaina o alagaupu faa-Samoa, i totonu o le tatalo.

Ia tatou manatua, a tatou tatalo, o lona uiga, ua e i totonu o le mamalu o le Atua. E te le aumaia ni alagaupu faa-Samoa i totonu o le tatalo, auā e iai alagaupu e le lelei ana mafua’aga. E iai nisi alagaupu Samoa na mafua mai i tu ma aga faapaupau i ia ona po.

Toatele foi, ua fa'aaoga soo le upu lea o le 'Susuga.' Se faataitaiga, *Alofa mai le Atua ma faatasi mai i le Susuga i a Pai ma Lafai.*

A tatou afe i luga i le lagi pe a tatou tatalo, ia tuu ese o tatou mamalu. E le aumaia ni a tatou mamalu i luma o le Atua.

O se apoapoaiga foi lena i le autalavou i lena aso, ia faafaigofie le gagana e te fesootai ai ma le Atua. E le o fia faalogo le Atua i lou atamai i le aganuu pe a oulua talanoa. *God genuinely wants to see and hear you despite your status in society.* Ioe, toatele foi o tagata a tatalo, e pei ua lauga I le Atua. *It is not a sermon, it is a PRAYER.*

Afai ua tofia oe le tama ma le teine o le autalavou, e tatalo i luma o se faapotopotoga, ia e muai tapena. Auā, ua tofia oe e fai ma sui o le faapotopotoga, e momoli le talosaga i le Atua. Afai e mamalu ma paia le Atua, e tatau foi ona mamalu le faiga o le tatalo. 'Aua le faataga faia.

A oo ina muai tapena au tatalo i soo se ituaiga taimi ua tofia ai oe, e atili ai ona faagaganaina oe e le Atua.

O le auivi lena o le tatalo:

- 1. Fa'aneetaga Praise-** O le vaega lea e tatau ona e fa'aaoga le gagana fa'aviivii i le e ou le pule ma le mana uma lava. Ia tatala lou loto i le mamalu ma le Silisili ese o le Atua. Se fa'ataitaiga, *Le Atua na foafoa le lagi ma le lalolagi. Ua matou patipatia lou suafa mamalu. Aua e tatau i lau afio le viiga, le faamanu ma le faaneetaga. O lau afio o le pogai o le ola. O lau afio o le puna o mea lelei uma.*
- 2. Fa'afetai Thanksgiving-** Amata i totonu o lou li'o. O le vaega lea, e tatau ona e faafetai i le Atua i le fesoasoani i lou ola talavou. Fa'afetai ona o le tausiga alofa o lou aiga, totonu

o a'oga ma fale faigaluega, o lou nuu, Ekalesia, o mea o loo tutupu i totonu o le siosiomaga, faapea ma le lalolagi.

- 3. Fa'atoesega Confession-** O le vaega lena o le tatalo, e tatau ai ona tautino o tatou sese i luma o le Atua. O le agaga lena o le tagata ua avea ma Kerisiano faamaoni. Aua, e iloa ai e te le tonu ma sa'o i taimi uma. E iai lava o tatou vaivaiga. O le vaega lea, ua tootuli ai ou tulivae i la le agaga ma faamaualalo i luma i le Atua i a tatou agasala. O le upu a le tusi e faapea, afai e te le tautino ou sese i luma o le Atua, e le mafai ona faamagaloina oe e le Atua. O le a le mea e tupu pe a le faamagaloina tatou e le Alii? O le tali, e iu vale o tatou olaga. E te ola faamaualuga pea i taimi uma, ma afaina ai lou soifua faapea foi ma nai ou uso a Kerisiano.
- 4. Manaoga Intercession-** E tutusa foi le vaega lea ma le 'Faafetai.' E amata i totonu o lou li'o ma talatala i tua. O le taimi lea ua e valaau ma le agaga maualalo i luma o le Atua, e tatala ma auina mai lana pule, mana, ma le malosi e faatasi mai ia i tatou. Ma ia aua nei galo o lana mana e mafai ai ona faamanuia mea uma o loo e manao i ai. O lea foi vaega, e iloa ai o oe o le Kerisiano o loo naunau ina ia manuia mea uma e tusa ma le finagalo o le Atua.

Faatinoga o le Mataupu

Manaia foi lena avanoa e faasoa i se polokalame fai mo le autalavou pe afai e lei faia. Ina ia faamasani tupulaga i le ola tatalo.

Aotelega a le Taitai

- Afai e te tatalo, ia faafaigofie le gagana. Aua le fa'aaogaina ni alagaupu Samoa.

- Afai tatou te tatalo, ua e valaau i le Atua ina ia tatala mai lana pule, mana, ma le malosi, e fesoasoani mai ia te oe, ina ia faatino le galuega o le faaolataga i le lalolagi.

.....

Aso Sa: 24 Iulai 2022

Mataupu: VAAIA LE ATUA I LANA FOAFOAGA
(The revelation of God through his creation)

Tusi Faitau: Roma 1:19-20

Fesoasoani mo le taitai

Masani ona tatou matamata i le televise ma nisi foi ala ua faasalalau mai ai news po o tala mai le lalolagi, i le soona fai o le foafoaga. O tala e pei o le faaleaga o le siosiomaga *pollution*, o le faasaua i meaola i le laueleele ma le gataifale *animal cruelty*, o le soona suatia le laueleele, ma le tele o isi mau faiga a le tagata.

Ia tatou malamalama o le foafoaga leni ua fai ma molimau o galuega mamana a le Atua. Na faia e le Atua le foafoaga tatou te puipui, galue ma le alofa, ma vivii ai i lona suafa mamalu. *The creation testifies God's work*. O lona uiga, e le soona ulavavale ma taaalo ai tatou i le foafoaga na faia e le Atua.

O le faaleagaina ma soona fai le foafoaga a le Atua ina ia faamalie ai le loto o le tagata, ua mafua ai le tele o faamai i leni vaiata.

Afai ua tatou faaleagaina le foafoaga a le Atua, o lona uiga, ua e fai i le Atua – ‘ou te lē fiafia i le foafoaga na e faia.’ Afai foi tatou te faaleagaina le foafoaga, e mafai foi ona faaleaga e le foafoaga i tatou. *If we destroy the environment, it's like you are*

saying to God, 'I don't like it.' If we destroy the creation, the creation will destroy us.

O le isi foi itu lena o le upu a Paulo i le Ekalesia i Roma.

Faatinoga o le Mataupu

Ia tali fesili nei:

1. Po o a faiga faaletagata (*human activity*) o loo faaleagaina ai le foafoaga a le Atua i ona po nei?
2. Ma poo a foi au ala e mafai ai e tatou ona faaleleia le tatou siosiomaga?

Aotelega a le Taitai

- Ia faamamā lelei lo tatou siosiomaga. Fa'ataitaiga, tuu lau lapisi i totonu o le lapisi.
- Ia e alofa i meaalofo. Aua le fa'asaua i ai latou.
- O mea lelei e te faia i lou siosiomaga, e iloa ai lou ituaiga falea'oga
- To'aga e toto ni au la'au i tua o lou fale, e maua ai le okesene.

.....

Aso Sa: 31 Iulai 2022

Mataupu: TOILALO LE LEAGA I LE LELEI
(Overcoming evil with good).

Tusi Faitau: Roma 12:9-21

Fesoasoani mo le taitai

Roma mataupu e 12 o loo fa'aaogaina e Paulo le gagana faamalosi'au po o le *exhortation*, e pei ona fa'aaogaina e ia i lana tusi i le Ekalesia i Korinito.

O le a le mafuaaga? Ona ua vaai atu Paulo i Ekalesia i Korinito faapea foi i Roma, ua amata ona taapeape le fanau a le Atua. Mafua mai ona o le fe'ese'esea'i o lagona ma talitonuga. Aemaise le va o Iutaia ma tagata Kerisiano.

O le mataupu lenei e 12, o loo faamamafa ai e Paulo le taua o le OLA FOU IA KERISO *New life in Christ*. Ina ia taofia ai le feitaga'i, ae tupu ai le fefaamagaloa'i o tagata. O le faamalosi'au lena Paulo i le Ekalesia i Roma, ina ia toilalo ai le leaga i le lelei.

Faatinoga o le Mataupu

1. Afai e toalaiti lau autalavou, ia tofua le tagata ma le pepa ma se peni. Afai e toatele, vaevae i ni *groups*. Pule lava oe.
2. Toe silasila i le tusi faitau o lenei mataupu, ma ia filifili lava le tagata se upu se tasi o loo taia i lona va'ai e faatatau i le manatu autu o lenei aso – Toilalo le leaga i le lelei.
3. Fa'amatala le uiga o lena upu i ou lava lagona. Ma ia faatatau i le soifua ma le ola o le tama ma le teine talavou i nei ona po.
4. Ia taitasi ma faailoa lana upu ua filifilia ma faailoa lona uiga i luma o le autalavou.
5. 20 minute e faatino ai le mataupu.

Aotelega a le Taitai

- Ia tausii le filemu. Ma ia aua nei vave le ita i lou uso. A e ita, 20 sekone e te manava i totonu, manava i fafo ona maua lea o le mafaufau lelei.
- O oe o lou fili *You are your worst enemy*. O lona uiga, o lau lava filifiliga e te faia ai le leaga ia te oe. Ia to'a pea le tai, ae ia mafaufau lelei i lou ituaiga tagata, faapea ma lou aiga. *You tell the story of yourself and your family through your actions*.
- 'Aua nei o tatou tau'i ma sui, e faamasino foi lou uso. E ta'u mai iina ua e faia'ina i faiga a le fili. O le vai e tineia le afi. Fai mālū ou faiva. Ma ia e taaalo faa-aKerisano. Aua o lou manumalo lea.

.....

Aso Sa: 7 Aokuso 2022 (ASO SA O TAMĀ)

Mataupu: AUAUNA (Serve)

Tusi Faitau: Ioane 13:12-17

Fesoasoani mo le taitai

O se mataupu e manaomia le talanoaina i totonu o le tatou sosaiete. Aemaise le malosi o le itu pa o alii nai loo tamaitai. O se mataupu e aoga foi mo lenei aso faapitoa mo tamā.

Ua faamauiina i le tele o le 'au sutesue, le maoa'e o le faasauāina o tamaitai i totonu o le sosaiete. Aemaise lava le va o ulugalii (*domestic violence*). E i ai lava ofisa o matagaluega o loo nafa ma le fofoina o nei ituaiga faafitauli o loo tutupu i lenei vaitau i Samoa.

Ae o le fesili tele, o le a se tuualalo o le Tala Lelei mo tamā? O le a se tatou vaai i ai i le itu faaleagaga o aoaoga a Iesu mo tatou i nei ona po?

O le faataitaiga lava lea na faia e Iesu i ana au so'o. Ua afio mai lava le Tupu o Tupu ma le Alii o Alii e mulumulu o latou vae. O le taimi lea, ua fa'ate'ia le au soo aua e le faia e se tupu lea mea. O le galuega lenei a le pologa.

Ae o le mataupu Silisili i le galuega a Iesu o loo ta'ua i le tala, o se faataitaiga mo tagata ua pale mai i tofi maualuluga. O taitai o aiga, o nuu, Ekalesia, o fale faigaluega, ma soo se faalapotopotoga lava. Ia latou pule ma le alofa pei o Iesu. Ia latou taumafai e o mai i lalo e auauna i tagata e pei ona finagalo ai Iesu. *Serve others so that the glory of God is praised. Look upon the lowly, and offer your hospitality.*

Afai o tamā o le ulu o le aiga, e le faapea e tietie mai luga o le nofoa ma u'u mau i le pule. Ae ia pule ma le alofa. Ia soalaupule ma le tinā o le aiga, ma ia faatalanoa le fanau i faafitauli o loo tutupu i o latou ola. O iina e iloa ai le tamā alofa, o loo faia le tiute o le auauna.

Faatinoga o le Mataupu – Pese Siva

1. Vaevae le autalavou i ni vaega se lua.
2. Ia alu le vaega ma fatu nai upu o le pese siva e faatatau i lo tatou autu o lenei aso – **AUAUNA**.
3. 30 – 40 minute e faatino ai lea pese siva. 'Aua le fa'atagā faia. O iina e iloa ai lou ituaiga auaunaga.
4. Toe o mai i totonu ma faailoa mai le pese siva a le vaega.

Aotelega a le Taitai

- Ia e fiafia e auauna i le Atua e ala i le loto fesoasoani i tagata.
- E le na o tagata o lou aiga ma lou Ekalesia e te fesoasoani i ai. Ia tatala i tua le malo o le Atua i fafo o lou lotoifale.
- A tatou maua le loto maualalo ma le agamalu, le loto alofa ma le onosai, o oe lena ua tofia e fai ma taitai lelei.
- O se feau foi lea mo tama, ia alolofa ia tinā ma le fanau. E ala i le pule ma le alofa, ae aua ma le faausausili. Ona e iloa lea, o oe le tamā ua OLA IA KERISO.

.....

Aso Sa: 14 Aokuso 2022

Mataupu: FA'ASAO LE UAMEA, FAALEAGA LE FANAU (*Spare the rod, spoil the children*)

Tusi Faitau: Fa'ataoto 22:6; Teuteronome 6

Fesoasoani mo le taitai

Ua tele lava suiga i lenei vaitau. Aemaise i le aoaiga o fanau i totonu o aiga ma totonu o le fale o le faifeau. O ia aso na tele ona sasa e matua latou fanau ma faatonu ina ia usitai ma faaaloalo i tagata. Sa mafai foi i totonu o potu aoga, fale o le faifeau, etc...

O le taimi nei ua fiafia e post i luga o le Facebook o fusuaga i totonu o a'oga po o le taulaga. A sasa pe fasi foi e le faifeau se atalii o se tiakono po o se a'oa'o, ua mafai ona molia faifeau i le faamasinoga. Ae o ia ona po, e fefefe lava tagata e o i le fale o le faifeau.

Faamata pe le o le mea lena na atamamai ai ma popoto tupulaga i ia ona po? Ona o le sasa ina ia aoai le tamaitiiti e tusa ma ona ala?

Faatinoga o le Mataupu

1. Ia faatino se finauga (debate) i le mataupu ua ta'ua i luga. O le fesili – *E tatau ea ona faasao le uamea, ae faaleaga tamaiti? Should we spare the rod and spoil the children?*

Aotelega a le Taitai

- O le sasa a matua, e te poto ma e atamai ai.
- O tua atu o le sasa ma le ote a matua, o loo iai le alofa faamaoni.
- O le alofa faamaoni lea ina ia e ola manuia pe a oo ina e ola i le olaga o le tagata matua.
- O le aoaiga ina ia e ola i le alofa o le Atua. O le faaaloalo lea i soo se tagata.
- E ese ai lava ma matua ua faaoo lima i se isi auala le migao e pei o le onā.
- If you are spoilt, you will grow up desiring freedom too early and lead to so many consequences.
- Discipline is key for all Samoan youth of this generation. It will make you strong.

.....

Aso Sa: 21 Aokuso 2022

Mataupu: O LE UPU A LE ATUA O LE PELU
(The Word of God is the sword)

Tusi Faitau: Mataio 10:34

Fesoasoani mo le taitai

Masalo e toatele tagata o loo afaina i lauga a faifeau i luga o le pulelaa pe a folafolaina le Upu a le Atua. E toatele ua faaoga sese le Upu. Ua laugaina le Upu ina ia faamalie ai lona loto. *Preaching the Word of God to best suit his or her situation.*

Ae e iai foi nisi ua faaoga le Upu e faatatau i mea o loo tutupu i totonu o le siosiomaga o lana aulotu. *Contemporary preaching is personal.* E leai se mea e leaga ai lea tulaga o le folafolaina o le Upu, aua afai e talafeagai ma le afioga a le Alii, e tatau lava ona faatatau i mea o loo tupu i le lotoifale o le lafu mamoe. *A true preacher will be inspired by the Truth from God.*

O lea, aua nei ita pe afai ua e taia i le feau a le faifeau. Aua o le Upu a le Atua, o loo iai le pelu. Ioe, o Iesu lava o loo talaiina le filemu iai tatou. Ae o le pelu o loo faauigaina i le Tala Lelei o loo iai le mea amiotonu ma le faamaoni. O le mea moni lea mai le Atua e iloa ai i latou ua talia le Upu ma i latou e teena le Upu. *Those who choose to accept the Word and those who reject the Word.* O le Upu foi a le Atua ua faatusa i le pelu, ina ia faafifilemu ai o tatou olaga ulavavale.

Toatele foi o tagata ua teva mai le Ekalesia ona o le faifeau ua lauga i le mea moni. Ona alu lea e sue se isi aulotu e na te mafaia ona faamalieina lona loto. Peitai, e leai. O le Upu a le Atua e i ai le mana ma le malosi e lauga sa'o ia te oe. E taia ai oe ma faailoa atu ia te oe, e i ai amio e tatau ona tuu loa i le taimi lenei. O oe lava ua e nofo ma faaita oe i le Upu a le Atua.

Pau lava le mea, ia e nofo ma mafaufau i le feau, po o le a se aoga o le Upu ia te au ma lou aiga?

Faatinoga o le Mataupu

1. Toe to manatu pe na iai se taimi na e taia ai i le Upu a le Atua?
2. O le a le mafuaaga na e taia ai?

3. O le a sou tali atu *response* pe a faia ua taia oe i le Upu mai le Atua ua folafolaina e le afaigaluega?

Aotelega a le Taitai

- Aua e te vaai i le afaigaluega pe a lauga. Ia e faalogo i le feau o loo aumaia i le ua tofia e folafolaina le Upu.
- E te vaai loa i le tagata, sola atoa le manaia o le feau mai le Atua. Aua, e mafai ona fa'aaoga e le Atua o tagata e te vaai faatauvaa iai, e momoli mai le Upu i lou loto.
- A taia oe i le feau ua folafolaina, 'aua e te ita. E ta'u mai iina, masalo ua aoga le feau mo oe.
- A e ita, nofo lelei ma toe mafaufau, nei aveva lou ita e te faia ai se mea sese.
- Aua nei tatou faapea o le Upu a le Atua na sau e faamalie lou manao. E tele aoaoga a Iesu e mafai ona feteenai ai ou mafaufauga, ona o lea e te ola i le lalolagi.
- O aoaoga a Iesu, e faaleagaga uma.

.....

Aso Sa: 28 Aokuso 2022

Mataupu: MATAUPU SILISILI O LE FO'AI
(The principle of giving)

Tusi Faitau: 2 Korinito 9:6-8

Fesoasoani mo le taitai

O le tusi lona lua a Paulo i le Ekalesia i Korinito, o le feau o le faamalosi au i tagata i Korinito, ia tumau pea lo latou faatuatua i le Tala Lelei. Ma ia manatua pea e i latou o apoapoiga ma fautuaga a Paulo, ia manatua pea nai tagata lima vaivai i totonu o le latou sosaiete.

Faamamafa e Paulo i lana tusi lenei, le foai ma le loto malie. Ae aua ma le tiga ma le faatauanauina.

Talitonu o se feau taua foi lea mo tatou o le a agai atu i faiga taulaga i le masina fou. Ua toatele ua foai tele ona o le tofi maualuluga o loo latou uumauina. Se faataitaiga, o a'u o le matai sili o le nuu, e tatau ona sili atu la'u foai. O iina ua amata ai ona fosi le malosi e taumafai e sili atu ana mea e foai, ae na te silafia lelei, e le au ai lona malosi.

Toatele ua tomumumu ina ua pa'u'u faiga taulaga. O lona uiga, e le o foai ma le loto malie, ae ua foai ona o le vaaiga a tagata. E moni lava e iai foi nisi ua faatauanau o latou aiga ina ia sao mai le ta'i fia afe ma ona tupu i mea a le lotu, ae uma ifo ua le lava le faasoa o le vaiaso e totogi ai pili o fanau, o meaai ma le tele o isi mau mea e fai i totonu o le aiga.

Fai muamua lou lotoifale ona e tilotilo ai lea i fafo. A faaletonu le lotoifale o le tagata ona a lea? Faapefea la ona fai mea o le lotu? Tatou faaeteete le fa'aaogaina o le afioga a le Atua, e taumafai ina ia tulei ai le faiga taulaga. Aua o le Atua e silasila i le loto o le tagata, po o na te faia i le loto faatauanau ma le fia sili, po o le loto malie ma le agamalu.

E manino lava le upu a le Aposetolo a Paulo, ia foai ma le loto malie. 'Aua ma le tiga ma le faatauanau. God loves a cheerful giver.

Faatinoga o le Mataupu

- O le a le uiga o le tala o loo faatatau i le foai?
- O le a foi se faatatau o le tala i le Ekalesia a Keriso?
- O le a se feau mo tatou tupulaga talavou?

Vaevae le autalavou i ni vaega se 3

1. Ia tofu uma vaega ma se pepa e faamau ai i lalo o latou tali.
2. Ua tuuina atu le manatu autu i groups taitasi e mafai ona 'au'au ai mafauauga faaleagaga i le mataupu silisili o le foai.
3. **Group 1** – Luka 21:1-4 **Foai ma le faatuatua *Give with trust. God is the first priority.***
4. **Group 2** – Mataio 6:2-4 **Foai ma le filemu *Give with quietness***
5. **Group 3** – Mataio 25:34-40 **Foai ma le uiga *Give with purpose***
6. Ia faitau ma **malamalama** vaega taitasi i tusi ua tuuina atu, ma tali fesili ua faailoa atu i luga.
7. Toe faapotopoto mai le autalavou ma faailoa le uiga o latou Faataoto ma tali o latou fesili.

Aotelega a le Taitai

- Ia foai ma le loto malie 'aua ma le tiga ma le faatauana. *God loves a cheerful giver.*
- Aua le avea lou tofi maualuga ma mea e tatau ai ona e foai tele.
- O le Atua e tatau ona faamuamua. 'Aua le manao tele i le 'oa faalelalolagi.
- Ia e malamalama i le uiga o le foai e ala i aoaoga o loo fai mai le Tusi Paia. Ona e lagonaina lea o le fiafia ma le mafaua lelei, ma tupu ai lava lou loto foai.
- 'Aua le foai ona ua e fia tagata ma e fia iloa. E le silasila le Atua i le tino. E silasila le Atua i le loto o le tagata.

.....

Aso Sa: 4 Setema 2022

Matāupu: MANUMĀLO I FA'AOSOOSOGA.

Tusi Faitau: Iakopo 1:12-15

Fesoasoani mo le Ta'ita'i:

O le a le eseesea o fa'aosoosoga ma tofotofoga? O tofotofoga e mai le Atua mo le lu'iina o le fa'atuatua o le tagata Kerisiano, ae o fa'aosoosoga, o ala o le ti'apolo e maileia ai le tagata ia agasala.

Auala ina ia mafai ona manumalo mai i fa'aosoosoga:

E fa'aosoosoina tagata uma.

O le mea mautinoa lava e fa'aosoosoina tagata uma. E lē popole lava le ti'apolo po'o a ni tatou tofiga maualuluga, e sau lava ina ia tatou pa'u'u atu i le malaia. O le pepelo pe a fa'apea e le'i fa'aosoosoina lava se tagata e se ti'apolo. O lo'o manino i le Tusi Pa'ia, e lē se agasala le fa'aosoosoga, ae o lo tatou gaua'i i le fa'aosoosoga ma fai ai le agasala, o lo tatou sesē lea. Manatua Iesu, sa fa'aosoosoina fo'i, ae le'i agasala ai. (Eperu 4: 15) "... a ua fa'aosoosoina o ia i mea uma e pei o tatou, a ua leai se agasala ia te ia..."

O lou tiute e tete'e i fa'aosoosoga.

(Fuaiupu 13) 'A fa'aosoosoina se tasi, 'aua le fa'apea, ua fa'aosoosoina a'u mai le Atua; auā e lē mafai ona fa'aosoosoina o le Atua i mea leaga, e lē fa'aosooso atu fo'i i se tasi.' Tasi lea natura o le tagata ola, e ola tautu'ua'i. 'Aua nei tu'uaia sē tasi pe a fa'aosoosoina i tatou. Auā o le mea mautinoa lava, e

fa'aosoosoina tagata uma. Ae afai tatou te fia manumalo i fa'aosoosoga, ia tatou taumafai malosi e tete'e ese, po o le alu ese foi mai se nofoaga o i ai le faaosoosoina.

Ola sauniuni.

Ia ola mautinoa e o'o mai lava fa'aosoosoga. Ae ia o'o mai fa'aosoosoga, ua leva ona sauni le tagata fa'atuatua e tali atu i ai. O le ola sauniuni, o le mata'ala, o le fai o le filifiliga sa'o, o le va'ai toto'a. (Fuaiupu 14) *'a ua ta'itasi ma fa'aosoosoina, pe a tosina ma maileia i lona lava tu'inaanau.'* E tele mailei a Satani e taumafai e fa'atosina atu ai le tagata i ana faiga, ae o tua atu, o lo'o i ai lo tatou malaia.

Fa'atinoga:

Fa'asoa le Autalavou pe fa'aapefea ona manumalo i fa'aosoosoga?

Aotelega a le Ta'ita'i:

- Ia mautinoa e fa'aosoosoina tagata uma.
- Ia 'aua ne'i tatou taumafai e tu'ua'ia se isi pe a fa'aosoosoina i tatou, a'o lou tiute, ia taumafai e tete'e fa'aosoosoga, ma alu ese ai.
- Ia sauniuni lelei ma mata'ala, ne'i o'o mai fa'aosoosoga.

.....

Aso Sa: 11 Setema 2022

Mataupu: O AI E ASAINA LE ALA I LE VAO LAFULAFUĀ?

Tusi Faitau: Isaia 40: 1-11

Fesoasoani mo le Ta'ita'i:

O le vao lafulafuā, o se togāvaio e lē faigofie ona uia e se tagata soifua. E lē gata e lavelave, ae e lē faigofie ona iloa ni manufeai o lalafi ai.

O le vao lafulafuā o lo'o tā'ua i le tusi faitau, o se gagana fa'atua i le faigata o le tulaga na feagai ma Iuta a'o fa'atāfea ai i Papelonia. O ni uiga, manatu ma faiga fa'a-le-lalolagi o lo'o taotaomia ai le sa'olotoga o le tagata soifua, mai le maua o manuia o le Atua ua leva ona i ai. O le ogaoga o le ola pologa ma le taotaomia i pulega a Papelonia, fa'atasi ai ma le faigata o loto le usita'i o tagata o Iuta, ua fa'amatalaina o se vao lafulafuā o lo'o taofia i latou mai le maua o ia manuia.

A'o manuia po'o sa'olotoga ia o lo'o fa'amatalaina e Isaia, o se ala matagofie, e telē lo la eseese ma le vao lafulafuā. Le ala e tataua ona fa'aleleia e le tagata lava ia. O le lu'iina o le filifiliga tonu e faia e le tagata e ogatotonu ai le moni o le talitonu ma le fa'atuatua i le Atua. Le filifiliga tonu ua atagia ai le fa'aleleia e le tagata lava ia o le ala e ui atu i le vao lafulafuā. Le ala fa'aleleia ua faamatalaina: *Fai mai o le ala, 'o ona vanu uma e fa'aeaina ia; o mauga uma ma mea maupu'epu'e e fa'amaulaloina ia; o mea fa'afiatatama'i e fai ma mea laugatasi ia, ma mea gaoā e fai ma mea laulelei.'* I se isi faaupuga, o le ala lea ua ta'ua o le ala ua fa'aleleia e le tagata ua filifili e ui i ala o le Atua, o le ala laugatasi. E lē maua ai se ma'a fa'alavea 'a'ao, po'o se ma'a fa'atu'ia 'a'ao. Ae na'o ma'a lāmolemole.

O le fa'aleleia e so'o se tagata Iuta o lea ala, o le fa'atinoina lava lea e le tagata lava ia, o le auala e na te maua ai le mafanafana o le Atua, po'o le fa'amafanafanaga a le Atua, ua leva ona lotolotoi i totonu o le nu'u o le Atua. O lo'o manino ma iloa ai, le Atua pule aoao. O ia lava lea o le Atua o le Ala i le manuia, ua o ese

so'o ai tagata Iuta na mafua ai ona o latou o'o i le malaia. Le Atua pule aoao, o Ia lava o le Atua fa'amasino. E pei ona atagia i upu a Isaia. E pei o le ao le silasila a le Atua i tagata uma, e pei o le mutia i latou. Le mutia e i ai le taimi e magumagu ai, ua fa'atusa i ai le tagatga ua savali i ala o le Atua. Ae lē mafai ai lava ona te'a ai le alofa fa'avavau o le Atua. O le toe aumai e le perofeta o Isaia o le mautinoa o le folafolaina mai e le Atua o le moni o lona alofa. Fa'ato'a uma atu lava ona folafola e Isaia le tulaga pagatia e o'o i ai le nu'u o le Atua mai le Isaia 1-39. O le fa'asalaina o lo latou lē usita'i. Ae o lea ua amata i le Isaia 40, le toe aapa atu o 'a'ao alofa o le Atua e toe fa'asao mai lona nuu. O le folafolaina o le mautinoa o le alofa pea o le Atua e fa'asaoina ma fa'amafanafana i lana tagata ua puapuagatia ma mafatia.

Galuega Fa'atino:

O lo'o a'oa'oina pea i tatou ma tatou mautinoa, e le tu'ulafoa'ina e le Atua ona tagata. Fesili: 'A o le a la le mea a le tagata e fai i totonu o lea alofa o lo'o faia pea e le Atua?'

Aotelega a le Ta'ita'i:

Ia avea i tatou e fai ma fa'alelei ala. Ua uma ona saunia e le Atua le ala, o le ala o le manuia mo i tatou. Ae o le tatou mea e fai, o le fa'alelei o le ala lenā. 'Aua tatou te fa'aleagaina. Auā tatou te fiu lava e fa'aleaga, e lē taitai ona leaga ai le ala i le manuia, ua faia e le Atua. Ia tatou fa'aleleia le ala lenā mo tatou lava, ina ia lelei mo isi fo'i uso-a-tagata. Fa'apefea ona fa'aleleia? Ia nofo fealofani ma tausii le filemu e pei ona finagalo le Atua. Ia iloa le va fealoai ma tagata.

.....

Aso Sa: 16 Oketopa 2022

Matāupu: FA'AA'UPEGAINA MO LE FA'AMOEMOE

Tusi Faitau: Salamo 57: 1-5

Fesoasoani mo le Ta'ita'i:

O le Salamo 57 e aofia i Salamo e fa'amatalaina ai le lagona o Tavita, i le taimi a'o feagai ma le mata'utia o le loto ita o le tupu o Saulo i lona fia fasioti ia te ia. O le Salamo e fa'afetai ai ma vivi'i Tavita i le Atua ona o lana puipuiga i lona ola. Ua toe fa'amatala ai e Tavita le mata'utia o le tulaga lamatia o lona ola na i ai. Ua pei ai o ia o se tagata ua leai se fa'amoemoe, e pei o se tagata o lo'o ta'oto i le va o ni leona. O leona ua fa'atusa i ai e Tavita le mata'utia o Saulo ma ona tagata o lo'o taupulepule e fasioti ia te ia. O tagata fa'apei oni leona e fa'amatalaina e Tavita, e mumu pei se afi lo latou ita. O o latou nifo o tao ma u fanafana. O o latou laulaufaiva, o pelu ma'ai. O foliga o tagata ua fa'a'aupegaina e Satani.

O le fa'amatalaina o ia tagata e pei ni lēona, ua atagia ai le silisiliese o le pule aoao a le Atua ma lana puipuiga malu, po'o lona fa'aa'upegaina o lana tagata fa'atuatua, e lē mafai e le malosi fa'a-leona ona fa'aleagaina.

Le fa'aa'upegaina lea e saafi ai Tavita I fuaiupu e tolu o loo amata ai le Salamo lenei e 57.

- **Fuaiupu 1** – fa'amatala ai o le Atua e malu ai le tagata fa'atuatua. Ua fa'atusaina i le manu e i ai ona apa'au, o ona paolo e malu ai tagata o le Atua. E pei o le matuāmoa e ofoofotai lana toloa'i.

- **Fuaiupu 2** – fa’amatala ai le Atua fesoasoani. E na te aumai le agaga ma le mafaufau lelei, e faia ai le filifiliga a le tagata fa’atuatua i le mea e tatau ona fai. E taunuu ai so’o se mea lelei.
- **Fuaiupu 3** – Fa’amatala ai le Atua fa’amalolo, le Atua fa’aola, e mapu i ai le tagata vaivai ma le mafatia.

O le fa’amatalaina o le Atua o Tavita, o loo lotolotoi ai le silisiliese o le pule aoao a le Atua, e lē gata o Ia o le Atua Fa’aola, ae o Ia foi o le Atua Fa’amasino.

Fa’atinoga:

O a’upega i le talitonuga fa’a-kerisiano, e lē gata e fa’a-le-tino, ae fa’a-le-agaga foi. I le fa’a-le-tino la, o a’upega o mea tau, e fa’aaoga i taua. O le fa’aa’upegaina la o se tagata o le fa’amoemoe, ia ola ‘aua ne’i oti, pe a tau i se taua.

Fesili: Ae a la le fa’aa’upegaina i le fa’a-le-agaga? Fa’amatala.

Aotelega a le Ta’ita’i:

E 2 lava mea tāua o lo’o atagia i le fa’aa’upegaina o Tavita e le Atua.

O le masani lava a lenei lalolagi, e i ai lava leona e pei ona tā’ua e Tavita. Tele leona e mumū fa’aafi lo latou ita. O o latou nifo e pei ni tao ma u fanafana, e pei ni pelu ma’ai o latou laulaufaiva. O tagata ia e fa’avaivaia le taumafai o isi tagata. Tagata ia e fa’aleaga olaga o isi talavou.

Ae o lo’o manino ai i le i ai i va o lēona ia, le tulaga ese ma le silisili ese o le Atua, ua fa’aa’upegaina ai tupulaga talavou o taumafai mo le Atua.

Aso Sa: 23 Oketopa 2022

Matāupu: O I TATOU O VALA’AULIA A LE ATUA

Tusi Faitau: Salamō 5: 1-12

Fesoasoani mo le Ta’ita’i:

Aisea e te vala’aulia ai se tagata i se fa’amoemoe tāua e pei o se fa’aipoipoga po’o se aso fanau? A’o ai tagata e te vala’aulia?

O le Salamō a Tavita, o lo’o ia sa’afi ai i sona lagona fiafia ma le olioli, ona o le amana’iaina o ia e le Atua. I se isi fa’aupuga faigofie, o le fa’aalia o lagona fiafia o Tavita, i le vala’auliaina o ia e le Atua. Vala’aulia e avea ma ana auauna, e fa’atino i le auauna atu i isi tagata. O le fa’aaogaina o taleni ma agava’a, o meaalofa mai le Atua, ina ia ola ai isi tagata. Ae o se vala’au e iloa ma lagonaina i le loto, ae le gata i lea, o le lagonaina o le fa’atauva’a pei ona lagonaina e Tavita, ona o le amana’iaina o ia e le Atua, e auauna mo ia e ala i ona tagata. Lea na afua ai ona ia ulu ai i le malumalu o le Atua, e ifo ma vivi’i i le Atua. O le fa’atāuaina o le tali atu a le tagata i le vala’au mai pea o le Atua, ina ia iloa ona ola i le olaga e finagalo ai le Atua.

O le olaga e finagalo i ai le Atua, o le olaga e atagia ai le fa’aaoga lelei o taleni ma agava’a mai le Atua, po’o meaalofa mai le Atua. O lona uiga, o le vala’auina o i tatou e le Atua, ia tatala ma fa’asoa atu meaalofa na ia foai mai i le tagata. E lē na ona fa’aaoga, ae ia fa’aaoga lelei ma le tatau, e tusa ma le fa’amoemoe na aumai ai e le Atua i le tagata. E lē o ni meaalofa e taofi mau ma teu, ae o meaalofa ia fa’aaogaina pei ona iloa i le taleni musika a Tavita. O lana taleni ta’ita’i’au. O lana taleni i le atia’eina o Isaraelu o se mālō, ma isi. E tāua le faa’aaoga lelei ma le tatau o meaalofa ia mai le Atua o loo I le tagata, ona o loo afifi ai le faamoemoe o le oo atu poo le i ai o le tagata faatuatua I

totonu o le Malo o le Atua. Le malo e i ai le fiafia ma le olioli e fa'avavau.

Fa'atinoga:

Tu'u le avanoa i le Autalavou, e fa'asoa mai ai le sui ia, po'o ona lagonaina o vala'aulia o ia e le Atua. Fa'amatala.

Aotelega a le Ta'ita'i:

O tatou uma o vala'aulia a le Atua, i tofi ma so'o se tiute o lo'o feagai ma le tagata lava ia. O fa'ata'ita'iga na o le vala'au mai o le Atua. O le vala'au ina ia fa'aaoga lelei ma le tatau meaalofa ua tu'uina mai i ai tatou uma. Ia maua atili ai se vi'iga o le Atua, ae ia ola ai fo'i nisi o e o lo'o mana'omia le fesoasoani.

.....

Aso Sa: 30 Oketopa 2022

Matāupu: O LE A TONU LE PAPA O LO'O FA'AVAE AI LE EKALEZIA A IESU?

Tusi Faitau: Mataio 16: 15-23

Fesoasoani mo le Ta'ita'i:

O le tusi faitau o lenei Aso Sa, o lo'o tā'ua ai le atia'eina o le Ekalesia. Na o Mataio o tusi a fai Evagelia, o lo'o tā'ua ai le upu 'EKALEZIA.' O le upu Ekalesia (*Ekklesia*), e sau mai le upu vala'au (*kaleo*). O le vala'au i le tala a Mataio, e lē na o le vala'au i upu, ae fa'apea fo'i fa'atinoga. Fa'ata'ita'iga: e vala'au atu Iesu i le a'oa'oa atu, e vala'au atu fo'i Iesu i ana fa'atinoga e fai, e pei o le fa'amālōlōina o ma'i.

O lona uiga, o le Ekalesia, o tagata ua vala'auina mai, ma ua tali atu i lea vala'auina. O tagata ia ua faia se fa'apotopotoga o tagata talitonu i le Atua, e ala ia Iesu Keriso, ua tā'ua ai le Ekalesia, o se fa'apotopotoga o tagata fa'atuatua po'o tagata Kerisiano. Le Ekalesia lea ma lona atia'eina i luga o le papa, lea o lo'o fa'amatalaina e le tusi faitau.

O le tali a Peteru e uiga i le fesili a Iesu po'o le a sa latou upu ia te ia, po'o ai. Lea na ia tali ai, "O oe o le Keriso, o le Alo o le Atua soifua." O le Atua soifua i le manatu o Peteru, o le Atua o le Ola. Le Atua na ia manava le ola i le tagata i le amataga. O le manava ola, o le Agaga lea o le Atua. O lona uiga, o le Keriso lea e malamalama ai Peteru, o le Keriso e i ai le Pule aoao, le Mana, ma le Malosi uma lava. Le Keriso ua i ona luga le Agaga o le Atua.

O le papa o lo'o finagalo Iesu e atia'e ai lana Ekalesia, o le papa lea o le *petra*, o le papa telē ma le mausalī. O le papa *petros*, o le papa la'ititi, po'o nutigāpapa, lea e igoa ai Peteru. I le molimau la a Mataio, o le papa telē, le papa *petra*, o le Agaga o le Atua, e atia'e ma fa'avae ai lana Ekalesia. O le mafua'aga fo'i lea o le tupu ma ola le Ekalesia a Iesu Keriso e o'o mai lava i le taimi nei, ona o lo'o fa'avae i luga o le papa mausalī, o le Agaga o le Atua.

Fa'atinoga: Taligā fesili.

1. O le a le uiga o le upu Ekalesia?
2. O le a le uiga o le vala'au i le Evagelia a Mataio?
3. Fa'amatala le eseese o le Ekalesia e fa'avae i luga o se tagata, ma le Ekalesia e fa'avae i luga o le Agaga o le Atua.

Aotelega a le Ta'ita'i:

Afai o le finagalo lea o Iesu ia fa'avae ma atia'e lana Ekalesia i le Agaga o le Atua, e tatau fo'i ona fa'avae le olaga ma talitonuga o tupulaga talavou a le EFKS i le Agaga o le Atua, ona le mafai lea e le ti'apolo ona manumālō ai. Ia mautinoa fo'i, so'o se mea lava e i ai le Agaga o le Atua, e i ai fo'i ma Satani.

.....

Aso Sa: 6 Novema 2022

Matāupu: E LE ULAGIA LE ATUA

Tusi Faitau: Levitiko 10: 1-7

Fesoasoani mo le Ta'ita'i:

O Nātapu ma Aviu, o le fanau a Arona. Sa vala'auina i la'ua e fai ma ositaulaga a le Atua, e pei o lo la tamā. O le fa'ata'ita'iga manino lea o tagata ua la ulagia le Atua, e ala i le lē tu'uina atu atoa o la tagata e tali o la vala'auina. A'o i la'ua na filifilia fa'atasi ma lo la tamā, e avea ma ulua'i ositaulaga ia Isaraelu. Na i ai fa'atasi ma Mose ma Arona, ma toea'i'ina e 70, i le taimi na fa'alatalata ane ai le Atua, ma fa'aalia i lona nu'u lona mamalu i faitoto'a o le falefetafa'i.

O i lā'ua na fai ma soa o Arona lo la tamā i le osiga o taulaga fa'amamā ai le falefetafa'i, ina ia afio tumau ai le Ali'i. O le fa'aaliga fo'i lea, na tu'uina ifo ai fa'atonuga o le osiga o taulaga, ma sa osia ai e Arona ma ona atali'i le taulaga, o le fa'amamāina i luma o le Ali'i. O le taulaga e fa'amamā ai Arona ma ona atali'i, auā le osiga o taulaga, fa'apea le nu'u uma lava, auā le feagai ai ma le Atua.

O lona uiga, ua o la malamalama lelei, o le avea o i lā'ua ma ositaulaga, o le tofiga mai le Atua, e ao ina tali i ai ma le tagata atoa. A'o lea ua o la soli fa'atonuga a le Atua, ua la lē savavali i poloa'iga o osiga o taulaga. Ua la ave afi ese i a la ipu e fa'amu ai mea manogi, ae o le afi e fa'amu ai taulaga, e pua'ina mai e le Atua, a'o lea ua ave a lā'ua lava afi, o le fa'aailoga o le ulagia o le Atua, o le fa'aailoga o le lē talitonu i le Atua.

O lo la iuga, o le malaia. Sa mu i le afi mai le Atua. O le aveesea mai o la tino mai le falefetafa'i i tua o le togalauapi, o le fa'aailoga o le tia'i fa'atino o manū. Auā o le nofoaga lea, e tia'i ai tino ma pa'u o manu e lē fa'aaogaina mo le osiga o taulaga. O le aveesea mai le falefetafa'i, o le fa'aailoga o le aveesea mai luma o le Atua. Sa fa'atonuina fo'i Arona ma ona atali'i, ia 'aua ne'i i ai se fa'anoanoa, 'aua ne'i faia ni faiga fa'aosilagi, o le fa'aailoga o le lē amana'ia e le Atua. O iuga ia o tagata latou te ulagia le Atua, ua fa'apei o se taulaga ua lē fia silasila i ai le Atua.

Fa'atinoga:

E i ai nisi tagata i le Tusi Pa'ia na latou ulagia le Atua? Fa'atusatusa a latou fa'atinoga na fai ma o latou taunu'uga ma le mea na o'o i ai le fanau a Arona.

Aotelega a le Ta'ita'i:

O le ulagia o le Atua, o se agasala matuiā. O le tau lava o le oti. Atagia ai le ola lē mata'u i le Atua. Ae a aunoa loa le tagata ma le Atua, ona pei loa lea o se va'a ua leai sona tapasā. Ua lē iloa le va tapuia o le tagata ma le Atua.

.....

Aso Sa: 13 Novema 2022

Mataupu: A’OA’OGA A PAULO I LE SOIFUA
FOA’I MO LE ATUA

Tusi Faitau: 2 Korinito 9: 1-15

Fesoasoani mo le Ta’ita’i:

O le fa’avae ma le fatu o le soifua foa’i po’o le soifua fai-aulaga o le EFKS, o le fa’aolataga na faia e le Atua e ala i lona Alo o Iesu Keriso, i lona maliu ma lona toetu. O le fa’aalia o lona alofa tunoa.

O le tusi faitau o lenei Aso Sa, ua vaevaeina i vaega se tolu.

1. Fuaiupu 1-5: Taulogologo e fai le foa’i.
2. Fuaiupu 6-12: Foa’i ma lona tau.
3. Fuaiupu 13-15: Fa’alateleina o le tau.

i. Fuaiupu 1-5: Taulogologo e fai le foa’i.

I le manatu o Paulo, e tatau ona faia pea le taulogologo ma le fa’amanatu pea o le taua o le soifua foa’i mo le Atua. O le fa’amoemoe, ia lelei le fa’atinoga o le foa’i. O lo’o taua i le fuaiupu e 3 le mafua’aga ua vave a’auina ai le au uso i Akaia, ina ia tapena ma sauniuni mamao le foa’i. O le fa’atatauina o le tapena mamao o le foa’i mo le Atua, ina ia lelei. Fa’ailoa fo’i e Paulo, ia ‘aua ne’i galo, o le foa’i na latou ofoina, o le meaalofo. O lona uiga, ia tapena le foa’i o le meaalofo, ua faia ona o le alofa i le Atua, ae le o ni mafua’aga fa’a-le-tagata.

ii. Fuaiupu 6-12: Foa’i ma lona tau.

O le mea mautinoa, e i ai le tau o le foa’i ma le alofa. O le tau e fua i le foa’i e faia e le tagata. A’o le foa’i e faia ina ua filifili i ai le lotu. O le tagata la e faia lana foa’i ina ua filifilia i ai lona lotu, o le tagata lena e alofa i ai le Atua i lana foa’i. A alofagia e le Atua le tagata, e manuia mea uma na te faia. E iloa i lana amio ma ana galuega, foliga alofa o le Atua.

iii. Fuaiupu 13-15: Fa’alateleina o le tau.

I le fuaiupu 15, *‘Fa’afetai i le Atua i lana mea foa’i fua e le mafa’amatalaina.’* Lea ua taua’i ai le foa’i o lo’o naunau le Aposetolo ina ia fa’atinoina. Ua fa’ailoa mai ai, o le alofa tunoa o le Atua, o le meaalofo foa’i fuaina mai, o le afuaga lea e tatau ona fa’avae ai le soifua foa’i po’o le soifua fai-aulaga o le tagata fa’atuatua, le foa’i ua faia ma le filifili o le lotu ua malie.

Fa’atinoga o le Mataupu: Fa’aaliga manatu.

Fa’amatala le uiga o fuaitau nei ma lo latou feso’otaiga i le soifua foa’i mo le Atua.

- E tupu mea ave, ae le tupu mea e teu pea.
- O le inati e to mo le Atua.
- Avatu, aumai.
- Avatu ni lo, aumai ni lo.

Aotelega a le Ta’ita’i:

O le alofa tunoa o le Atua, o le fatu lea o le faigataulaga a le EFKS, o le tali a le tagata i le alofa tunoa o le Atua. E alofagia e le Atua le tagata, e foai ma le lotu, aua ma le tiga, aua foi ma le faatauana.

.....

Aso Sa: 20 Novema 2022

Mataupu: FA'ATĀUA AVANOA.

Tusi Faitau: Mataio 15: 21-28

Fesoasoani mo le Ta'ita'i:

O le tala i le fafine Kanana na sa'ili ia Iesu mo se fesoasoani mo si ana tama teine, ua pagātia i le malosi o faiga fa'a-temoni. Sa sau ma le talitonu, o Iesu le tali o lona mana'o. Auā sa ia fa'alogo i vavega e tele sa faia e Iesu. O le ala lea o lona sulu mai ai ma le fa'atuatua, e mafaia e Iesu ona tuli ese le temoni o lo'o ulutino i si ana tama.

Ae tālofa e, e le'o lea le tali ane a Iesu:

- 1. Fuaiupu 23a.** *'A ua leai se upu na ia tali atu ai ia te ia.'* Fai mai e ui i lona taualaga ma loimata, ae le'i fai ane i ai e Iesu se upu. O le a sou lagona pe ana o oe lea e sulu atu ia Iesu mo se fesoasoani, ae le ano ane ia te oe? Masalo e lagona le ita, lagona le loto tiga. A'o le tinā lenei, sa lē avea lea ma ala e fa'avaivaia ai lona aioi atu ia Iesu mo se fesoasoani.
- 2. 'Ia e tu'uina atu ia te ia e alu, auā ua mulimuli mai o ia, ma alagā mai ia te i tatou.'** A toe fa'afaigofie upu nei a le au so'o, 'se Iesu, tuli ese lena fafine ua fa'alavelave ia i tatou.' O le manatu lea o le au so'o ina ia tuli ese lenei tinā, auā fo'i o le fafine o nu'u ese. A'o tagata o nu'u ese, o fili ia o tagata Iutaia. Ae le'i avea fo'i lea ma ala na ponatia ai lona taumafai atu ia Iesu mo se fesoasoani, auā fo'i e lē maua sona manuia mai tagata, ae maua i lona fa'atuatua pea ia Iesu.
- 3. Fuaiupu 24.** *'E le'i auina mai a'u i nisi, a e tau lava o mamoe o le aiga o Israelu ua le iloa.'* E foliga mai e fa'ailoga tagata le fetalaiga lea a Iesu. Ua ia finagalo ane lava

mo na'o ona tagata, ae fa'atuatua'i tagata o nu'u ese. E le'i solomuli ai le finau a lenei tinā ma lona talitonuga, e tali ane lava Iesu i lona aioi atu.

- 4. Fuaiupu 26.** *'E lē tataua ona ave le mea e 'ai a le fanau, ma lafo i uli.'* Lea ua fetalai sa'o lava Iesu e tusa ma le manatu o tagata Iutaia i tagata o nu'u ese, o uli.

Ae tali le tinā, **pe itiiti mea e pa'u'u mai mo uli, ua lava lea mo a'u, ou te tali ma le agaga fa'afetai.** O le fa'atāuaina e le tinā o le avanoa ua ia mauaina ai Iesu. I lona talitonuga, pau lava lea o le avanoa e maua ai le manuia mo si ana tama, o Iesu lea na ia fa'alogo ai i ana vavega e tele. Lea la ua ia apoina, tusa lava po'o le a le maualalo ma le tiga. Toe fetalai Iesu, *'Funa e, ua tele lou fa'atutua, ia fa'apea ona faia e pei ona e mana'o ai.'* I se fa'aupuga faigofie, *Funa e, sau ina alu, o lou fa'atuatua, ua e talia ai si avanoa itiiti lava e te maua, e maua ai le manuia lea ua e talisapaia.*

Fa'atinoga:

Tu'u le avanoa i le vasega, po'o i ai se tasi o le Autalavou, na te molimauina le sa'o lea manatu o le fa'atāua o se avanoa na ia mauaina.

Aotelega a le Ta'ita'i:

Ua faigata lava nei aso, ua lē maua gofie ni avanoa. O lona uiga, a maua loa se avanoa, fa'atāua ma fa'aaoga tataua. Tusa lava pe tigaina ma faigata lona amataga, apoapo lelei ma talisapaia. Tusa fo'i pe fa'atauva'a lona mauaina, ia fa'apelepele i ai. Manaia le auala na talia ai e le tinā Kanana le avanoa.

.....

Aso Sa: 27 Novema 2022

Matāupu: O LE VAI O LAOTIKAIA

Tusi Faitau: Fa'aaliga 3: 14-22

Fesoasoani mo le Ta'ita'i:

O Laotikaia, o lo'o fa'amauina o le Ekalesia mulimuli lea na tusi atu i ai Ioane, a'o fa'aunu'ua ai i le motu o Patamo. O le a'ai e lelei lona tamāoaiga. Ae peita'i, o le nu'u e lē maua ai se suāvai. E lelei lona tamāoaiga, ae leai se alagāvai. E fa'amoemoe ma fa'alagolago i vai mai isi nu'u. O paipa tetele e tata'i mai isi a'ai e maua mai ai le vai o lo'o fa'aaogaina e tagata Laotikaia. Fai mai le tala, ona o le mamao o le mea e sau ai le suavai lea, e o'o mai i Laotikaia, ua fa'aleogalua, ua lē mafai ona inu. E lagona le fa'afaufau ma oso ai le fia pua'i ona o le manogi, a'o le lagonaina pea o lona tofo e lē lelei.

O le fa'aaliga la e pei ona fa'amatala e Ioane, o le iuga lēnā o le tagata e lē ma'alili pe vevela fo'i, ae fa'aleogalua. Lea o lo'o tā'ua i upu a Iesu i le fuaiupu e 16, *'ou te luai atu ia te oe i lo'u gutu.'* O le ata manino lea o le fa'afitauli o lo'o sosolo i Laotikaia, ua latou manatu, o lo'o tumu i latou i le tamāoaiga, ae galo o lo'o mativa i le ola fa'a-le-agaga. Ua latou manatu fo'i. ua ia i latou le atamai fa'afoma'i, ae galo ai lo latou tauaso fa'a-le-agaga. Ua latou leiloa, o lo'o tutuli o latou taliga fa'a-le-agaga. Ua latou fai mai fo'i o lo'o fau ma soloi o latou lavalava mananaia, ae le iloa ai lo latou lē lavalavā i le silafaga Pa'ia a le Atua.

Fa'atinoga: Fa'amatala uiga o fuaitau.

1. E te lē ma'alili.
2. E te lē vevela
3. Ae fa'aleogalua.

4. Tauaso fa'a-le-agaga.
5. Tutuli fa'a-le-agaga.
6. Lē lavalavā i le silafaga Pa'ia a le Atua.

Aotelega a le Ta'ita'i:

Fa'amautinoa lelei lou tagata. E leaga le ola fa'alotolotolua, ola lē mautinoa, ola māsosalalo. O le iuga, e luai mai fafo e le fia inumia e se isi.

O le atoatoa o le ola talitonu o le Kerisiano i le Alii, efaalagolago lea i lona ola faa-le-agaga. Po o le a le potu ma le mau mea o le tagata, ae a aunoa ma le Alii I le olaga – maumau lava, e leai se uiga.

.....

Aso Sa: 4 Tesema 2022

Matāupu: O SE LISI ESE O MEAALOFA.

Tusi Faitau: Efeso 4: 7-13

Fesoasoani mo le Ta'ita'i:

I le tusi faitau, o lo'o fa'amauina ai nisi o itauaiga meaalofo. O meaalofo e maua ai isi meaalofo. I se isi fa'aupuga faigofie, o le fa'aaogaina e le tagata o meaalofo mai i le Atua ina ia fa'asoa atu pe fai meaalofo ai fo'i i isi tagata.

O le matāupu e 4, o le vaega lea o le tusi a le Aposetolo o Paulo i Efeso, e amata mai ai le vaega e ta'ua o **'Fa'atinoga o a'oa'oga o le Fa'aolatagata.'** E fa'agata mai i le matāupu e 6. O le tusi faitau la o le tatou matāupu e fa'aigoaina, **'O le olaina o le fa'a-kerisiano i totonu o le aulotu.'** Ua mafua ona fa'amamafa e Paulo le matāupu lea, ona o se tasi lea o vaivaiga o le Ekalesia i

Efeso. E ta'uta'ua Efeso i le lelei ma le popoto o ona tagata i le vaai mai a le mālō o Roma. Ae o le fa'afitauli, o le olaina o le fa'a-kerisiano i aso uma, ua matua telē lava le fa'alētonu.

Lea ua toe fa'amatala ai e Paulo le **alofa tunoa**. O le meaalofa a le Atua i le tagata, e lē ona o se lelei o se tagata na mafua ai, ae ona o le alofa fa'amaoni o le Atua i le tagata agasala. O le mafua'aga fo'i lea, e lē fa'apitoa se tagata na te mauaina. O le meaalofa na auina ifo mo le tagata ua i ai atoatoa le isi meaalofa a le Atua, **o le Agaga Pa'ia**. Meaalofa ia a maua e tagata lotu, ona fa'ateleina ai lea ona mauaina o isi meaalofa a le Atua. E pei o le ave ma Aposetolo, perofeta, leoleo ma a'oa'o. O i latou e fa'atinoina le galuega o le auauna, e atia'e le tino o Keriso. Ae maua atili ai fo'i ma isi meaalofa, **o le ave ma tagata matua**. O le matua i le tofā ma le fa'autaga, e māfua ona ua i le tagata fa'atuatua meaalofa o le Agaga, o lo'o tā'ua i le amataga o le mataupu e 4. O le loto mauualalo, o le agamalu, ma le onosa'i. O le fa'apalepale o le tasi i le tasi i le alofa. O le taofi i le loto gatasi i la le Agaga i le noataga o le filemu.

O le fa'amoemoe o le Aposetolo, o le ola lea e tataua ona olaina ai e le tagata lotu o le Ekalesia i Efeso, le faakerisiano i aso uma. E maua ai le feoeoeai ma le fetausiai. E maua ai le fefa'amagaloai.

Fa'atinoga:

O le a la le lisi ese o meaalofa o loo i le vaega leni o le tusi a Paulo i Efeso?

O le tali: 'E iloa moni le tagata kerisiano auai, o le lotu i Efeso, i le auauna e fa'avae ma fa'alagolago ma fa'amoemoe i le meaalofa sili o le Agaga Paia. E afua mai ai le iloa e le tagata fa'atuatua o mea uma, amata mai i le manatuaina o le alofa tunoa o le Atua. O le auaunaga, e lē ina ia mo le tagata lava ia, ae ina ia

manuia ma ola ai le isi uso-a-tagata, ae ia sili ona maopoopo ma fealofani ai le aulotu ma le Ekalesia.'

Fa'atinoga:

O a meaalofa a le Atua o lo'o ta'ua i le tusi faitau? A'o le a se tali a le tagata i ia meaalofa mai le Atua?

Aotelega a le Ta'ita'i:

Tele a tatou lisi o meaalofa auā le Kirisimasi o le a o'o mai. A o lea ua faamanatu mai e le Aposetolo le lisi ese o meaalofa ia aua nei galo iai tatou. O meaalofa e mafua ona tatou maua oua ua tatou faamoemoe pea ma faalagolago i le musumusuga a le Agaga Paia. O meaalofa o le ola faakerisiano. O le loto mauualalo, onosai, ma le faapalepale i le isi I le alofa.

.....

Aso Sa: 11 Tesema 2022

Matāupu: AVEA MA FETU TA'IALA

Tusi Faitau: Mataio 2: 1-2

Fesoasoani mo le Ta'ita'i:

- Faitau le Numera 24 ina ia faigofie ona malamalama i le tala.

O lo'o tā'ua i le Numera 24: 14-25, le perofetaga a Pala'amo ia Palako e uiga i le fetu o Iakopo. O se perofetaga o lo'o atagia ai o ni upu taumavae a Pala'amo ia Palako ina o le a toe fo'i. Fuaiupu 14. *(O leni, fa'auta mai, a a'u alu i lo'u nu'u ina maliu mai ia, so'u fa'aali atu ia te oe mea e faia e lena nu'u i lou nu'u i ona po*

amulī.) O lo'o atagia i nei upu, se mea o le a fai e tagata Isaraelu ia Moapi. O Pala'amo o le tagata o le Atua. Ua ia fa'ailoa atu le mea o le a tupu i le lumana'i ia Moapi. E i ai le taimi e iloa ai le fetū mai le aiga o Iakopo ma le to'oto'o e na te matuā sasaina itu e lua o Moapi, po'o tua'oi o Moapi. O tua'oi e taofia mai ai Moapiu mai le avea o ia ma isi o tagata, ua aofia i le fa'aolataga a le Atua, o le a sasaina. Lea ua taunu'u i le afio mai o Keriso na fa'ailoa mai e le fetū. Le Keriso na te sosofaina tua'oi o lo'o taofia so'o se tagata mai le manuia o le fa'aolataga.

Fe'au mo tupulaga talavou EFKS mo lenei Kerisimasi:

Ia avea outou ma fetū, o nisi o le aiga o Iakopo. O le aiga o Iakopo, o le aiga filifilia e le Atua mo se fa'amoemoe fa'apitoa. E fa'apēnā fo'i outou tupulaga talavou. O outou o sui auai o le aiga o le Atua i totonu o le aulotu ma le nu'u. Ia avea outou ma fetū ta'iala, e ta'ialaina nisi tupulaga i le lelei ma le manuia, Ae lē o le leaga ma le malaia. Ia avea ma fetū pupula e sosofaina tuaoi o lo'o taofia le ola taumafai o tupulaga o lou aiga, nu'u ma le aulotu mo le Atua.

IA MANUIA TELE LE KERISIMASI MA LE TAUSAGA FOU